



08453

遊記第五册上

江陰徐宏祖霞客著

子別姓李

季夢良會明編

荆溪金

煜贊

同邑

楊名時凝齋閣

族孫徐

鎮筠峪

重校

滇遊日記

一

季會明日乙酉七月余宗人季楊之遊難於舅氏徐虞卿

處顧余於館見霞客遊記攜滇遊一册去不兩日虞卿為

盜所殺火其廬記付祖龍是書遭其殘缺亦劫數也今全

集唯義興曹駿甫有之初駿甫亦好遊慕霞客之高聞其

死詣弔兼求遺書校錄子依以原稿付去逾一年而還今

遊記 五册上

滇一

其全集必存訪而得之甚易也又詩稿一册仲昭付梓人

陳仲鄰仲鄰遇難稿亦散失然其詩另為一册與記不相

屬缺之猶可記缺其一便非完璧當急求之

陳體靜曰余嘗考介翁於宜典史氏購得曹氏底本而此

册中亦僅載遊太華顏洞數小記而已其間自五月初九

至八月初六凡八十七日日記仍不可得豈駿甫所錄先

已非全文耶文章缺陷信乎有數存焉為之浩歎

鍾按滇一日記已為燼簡介翁最殘補治定知非輯綴假

合也或者一并汰之直將太華數節別作記外贅筆而滇

一則仍闕如豈復成令丙耶茲從陳本編正



遊太華山記

出省城西南二里下舟兩岸平疇夾水十里田盡萑葦滿澤舟行深綠間不復知爲滇池巨流是爲草海草間舟道甚狹遙望西山繞臂東出削崖排空則羅漢寺也又西十五里抵高峴乃捨舟登陸高峴者西山中遜處也南北山皆環而東出中獨西遜水亦西逼之有數百家倚山臨水爲迤西大道北上有傳圍園西上五里爲碧雞關卽大道達安寧州者由高峴南上爲楊太史祠祠南至華亭太華盡於羅漢卽碧鷄山南突爲重崖者蓋碧鷄山自西北亘東南進耳諸峰由西南亘東北兩山相接卽西山中遜處故大道從之上置關高嶢實當水埤焉余南一里飯太史祠又南過一邨乃西南上山共三里山半得華亭寺寺東向後倚危峯草海臨其前由寺南側門出循寺南西上南踰支隴入腋其二里東南升嶺嶺界華亭太華兩寺中而東突者南踰嶺西折入腋奏閣上爲危峰下盤深谷太華則高峙谷東與行處不對然路必窮極西腋後乃東轉出腋中懸流兩派墜石窟幽峭險仄不行此徑不見也轉峽又東盤山嘴共一里俯瞰一寺在下壑乃太平寺也又南一里抵太華寺寺亦東向殿前夾埤皆山茶南一株尤巨異前廊南穿廡入閣東向瞰海然此處所望猶止及草海若潏潏浩蕩觀當更在羅漢寺南也遂出南側門

稍南下循塢西入又東轉一里半南踰嶺嶺自西峰最高處
東垂下有大道直上爲登頂道截之東南下復南轉遇石峯
嶙峋南擁輒從其北東向墜土坑下共一里又西行石叢中
一里復上躡崖端盤崖而南見南崖上下如蜂房燕窩纍累
欲墮者皆羅漢寺南北菴也披石隙稍下一里抵北菴已出
文殊巖上始得正道由此南下爲羅漢寺正殿由此南上爲
朝天橋橋架斷崖間上下皆嵌崖此復巖崖中墜橋度而南
卽爲靈官殿殿門北向臨橋由殿東側門下攀崖躡峻愈上
愈奇而樓供純陽而殿供元帝而閣供玉皇而宮名抱一皆東向臨海
嵌懸崖間每上數十丈得斗大平崖輒杙空架隙成之故諸

遊記五册上
滇一

三

殿俱不巨而點雲綴石互爲披映至此始擴然全收水海之
勝南崖有亭前突北崖橫倚樓樓前高柏一株浮空漾翠並
樓而坐如坐危橋上不復知有崖石下藉也抱一宮南削崖
上杙木棧穿石穴棧懸崖樹穴透崖隙皆極險峭度隙有小
樓粘石端寢龕炊竈皆具北菴景至此而極返下朝天橋謁
羅漢正殿殿後崖高百仞崖南轉折間泉一方渟崖麓乃朝
天橋逆縫而下者曰勺冷泉南踰泉卽東南折其上崖更崇
列中止澗坪一樓若腰帶下悉墮阪崩崖直插海底坪間梵
宇仙宮雷神廟三佛殿壽佛殿關帝殿張仙祠真武宮次第連綴真武宮之上崖愈
傑竦昔梁王避暑於此又名避暑臺爲菴南盡處上卽穴石

小樓也。更南則菴盡而崖不盡。穹壁覆雲，重崖拓而更合。南絕壁下有倚蘭閣。北還至正殿，東向出山門，凡八折。下二里，抵山麓，有邨氓數十家，俱網罟爲業。邨南卽龍王堂，前臨水。海由其後，南循南崖麓，邨盡波連，崖勢愈出。上已過倚蘭舊址，南壁愈拓，削一去五里。黃石痕掛壁下，土人名爲掛榜山。再南則崖廻峭，巨石壘空，欽水折成壘。南復分接屏壁，雄峭不若前，而兀窳離奇，又開異境。三里下瞰海涯，舟出沒石隙中，有結茅南涯側者，莖懸仄徑下，得金線泉。泉自西山透腹出，外分三門，大僅如盎，中崆峒，悉巨石欹側，不可入。水由盎門出，分注海海中，細魚溯流入洞，是名金線魚。魚大不踰

遊記 五册上

滇一

四

四寸中，臍脂首尾金一樓如線，爲滇池珍珠泉北半里。有大石洞，洞門東瞰大海，卽在大道下。崖傾莫可墜，必迂其南，始得逶迤入。卽前所望石中小舟出沒處也。門內石質玲透，裂隙森柱，俱當明處。南入數丈，輒暗，覓炬。更南洞愈崇，拓共一里，始轉而分東西向。東上三丈止，西入窈窕，莫極。懼火炬不給，乃出。上山返抱一宮，問山頂黑龍池，道須北向太華中，乃南轉。然池實在山南，金線泉絕頂，以此地崖崇石峻，非攀援可至耳。余輒從危崖，歷隙上壁，雖峭石縫多稜，懸躍無不如意。壁紋瓊葩瑤莖，千容萬變，皆目所未收。素習者惟牡丹、紅葉、離披、布滿石隙爲此。地絕遘，乃結子垂垂，外緣中紅，又余

地所未見。主人以高遠莫知採鑿。第曰山間野藥不辨何物也。攀躋里餘。遂躡巔。則石萼鱗鱗。若出水青蓮。平散竟地。峰端踐側。鍰而南。惟西南一峰最高。行峰頂四里。凌其上。爲碧雞絕頂。頂南石萼駢叢。南墜又起一竇。兀峰高。心遜之。乃南盡海口山也。絕頂東下二里。已臨金線泉之上。乃於聳崖間觀黑龍池而下。

滇中花木記

滇中花木皆奇。而山茶山鵝爲最。山茶花大逾碗。攢合成球。有分心卷邊軟枝者爲第一。省城推重者。城外太華寺。城中張石夫所居。采紅樓樓前一株。挺立三丈餘。一株盤垂幾及

遊記 五册上
真一

五

半畝。垂者叢枝密幹。下覆及地。所謂柔枝也。又爲分心大紅。遂爲滇城冠。山鵝一花具五色。花大如山茶。間一路迤西。莫盛於大理永昌境。花紅形與吾地同。但家食時疑色不稱名。至此則花紅之實。紅艷果不減花也。

遊顏洞記

臨安府顏洞。凡三。爲典史顏姓者所開。名最著。余一至滇省。每飯未嘗忘鉅鹿也。遂由省中南。過通海縣。遊縣南之秀山。上一里半。爲灑穹宮。宮前巨山茶二株。曰紅雲殿。宮建自萬歷初。距今裁六十年。山茶樹遂冠南土。又南抵臨安府城。南臨瀘江。此江西自石屏州異。龍湖來東北。穿出顏洞。而合郡。

衆水亦以此洞爲洩水穴也。於是覓一導遊者於城東接待寺顏洞大道，當循城而南渡瀘江橋，導者從寺前隔江東北小路行，遂不得渡瀘江。東觀三溪會合處，由寺北循塘岸東行，塘東皆紅蓮覆地，密不見水。東北十五里，渡賽公橋，水自西北來，東南入瀘，又五里上山，爲金鷄哨，哨南瀘江會諸水。由此東入峽，峽甚逼，水傾其中。東抵洞口，尙里餘，望洞頂石崖雙劈，如門對峙，洞正透其下，重岡迴夾之，不可得見。求土人導入，皆曰水漲流急，此非遊時。若兩月前水涸，可不橋而入。今卽有橋亦不能進，况無橋耶？橋非一處，每洞中水深處，輒架木以渡，在例按君來遊，架橋費且百金，他費亦百金。土

遊記 五册上

真一

六

人苦之，乘普酋兵變，託言洞東卽阿迷境，叛人嘗出沒此，遂絕官長遊洞者。余必欲一至洞門，土人曰：須渡江南岸，隨峽入，所謂瀘江橋大道也。始悔爲導者悞，乃捨水洞，覓南明萬象二陸洞，從哨東下坡，復上山登頂，東瞰峽，江環峽，東入洞門，卽在東峽下。余所登山處，正與其上雙崖平對，門猶爲曲掩，但見峭崖西向湧水，東傾，搗穴吞流之勢，已無隱形矣。東北三里，踰嶺，脊下山二里，則極東石壁迴聳，如環半城，下開洞門，北向，余望之有異，從之直下，一里抵峽中，又一里半抵東壁下，稍南上，洞門廓然，上大書雲津洞，蓋水洞中門也。遊顏洞以雲津爲奇，從前門架橋入，出後門約四五里，暗中傍

水行中忽開門延景其上又絕壁迴環故自奇絕余不能入其前洞而得之重罅絕巖間且但知萬象南明不復知有雲津也誠出余意外遂瞰洞而下洞底水從西南穴中來盤門內而東復入東南穴去余下臨水涓徑之水濶三丈洞高五六丈而東西當門透明處徑可二十丈但水所出入直逼外壁故非橋莫能行出水西穴漸暗不可遠窺東爲水入穴處稍旁拓隔水眺之中垂列孔柱纒紛窈窕復上出洞外上眺東南北三面俱環壁無可上仍西出舊道北上山東一里踰嶺已陟東壁迴環上嶺塢中東向一里其地南北各起層峰石崖時窅萬象洞卽在北崖上乃導者妄謂在南崖下直下

遊記 五册上
滇一

七

者一里抵南崖二洞東向高四丈水從中湧出兩崖角起前對爲峽水出洞破峽勢極雄壯蓋水洞後門也又東二里抵老鼠邨執途人問之萬象洞在西北嶺上卽前所從下山處洞甚深歷降而下底與水洞通余欲更至洞門晚色已合去宿館尙十里念此三洞慕之數十年趨走萬里乃至而叛糞阻之陽侯隔之太陽促之導人又誤之生平遊屐斯爲最阨矣

隨筆二則

黔國公沐昌祚卒子啟元嗣爵邑諸生往祭其父中門啟一生翹首內望門吏杖箠之多士怒亦箠其人反爲衆桀奴所

復遂訴於直指金公。公諱瑛將逮諸奴。奴聳啟元先疏誣多士。事下御史金逮奴。如故。啟元益嗔。徵兵祭纛環直指門。發巨炮。恐之。金不爲動。沐遂掠多士數十人。毒痛之。囊其首於木。金戒多士母與爭。急疏聞。下黔督張鳴。崔勘。張奏以寃。時魏璫專政。下調停旨。而啟元愈猖狂。不可制。母宋夫人懼。斬世緒泣三日。以毒進。啟元隕。事乃解。宋夫人疏請孫程未勝。爵服乞權。署名侯長。賜襲。會今上登極。憐之。輒賜勅。實授卽今嗣公沐天波時。僅歲一周支也。

普名勝者阿迷州土寇也。祖者輅父子爲亂。三鄉維摩間。萬歷四十二年。廣西郡守蕭以裕調寧州。祿土司兵合勦一鼓

遊記 五册上
滇一

八

破之。輅父子俱就戮。始復維摩州。開三鄉縣。時名勝走阿迷。寧州祿洪欲除之。臨安守梁貴夢郡紳王中丞撫民畏寧州強。獨普樹之敵。曲庇名勝。初猶屯阿迷境。大十餘年。兵頓強。殘破諸土司。遂駐州城。盡奪州守權。崇禎四年。撫臣王伉憂之。裏玷笠。同二騎潛至州。悉得其叛狀。疏請勦。上命川貴四省合勦之。石屏龍土司兵先薄漾田爲所殲。三月初八日。王中丞親駐臨安。布政周世昌統十三叅將。將本省兵萬七千人。逼沈家墳。賊命黎亞選拒之。不得進。相持者二月。五月初二日。亞選自營中潛往爲名勝壽。醉返營。一童子洩其事於龍。龍與王土司夜劫之。遂斬黎進薄州城。環圍四月。卒不下。

時州人廖大亨任職方司賊恃爲與援潛使使入京縱反間謂普實不叛王撫起釁微功百姓悉靡爛于是部郎疏論普地不百里兵不千人卽叛可傳檄定何騷動大兵爲而王宮諭錫袞楊庶常繩武各上疏言宜勦事下樞部議先是王撫疏名勝包藏禍心已久前有司養疽莫發姪致成難圖蔓艸上因切責前撫按而前撫閔洪學已擢家宰懼勿能自解卽以飛語慫患大司馬大司馬已先入部郎言遂謂名勝地不當一縣撫按比周張大其事勢又延引日月徒虛糜縣官餉疎上嚴旨逮仇及按臣趙世龍十月十五撫按俱臨安就逮十二月十八周世昌中統死十三叅將悉戰沒五年正月朔

遊記 五册上
真一

九

賊悉兵攻臨安詐郡括萬金犒之受金攻愈急迨十六城垂破賊忽退師以何天衢襲其穴也天衢江右人居名勝十三頭目之一見名勝有異志心不安妻陳氏力勸歸中朝天衢因乞降當道以三鄉城處之今遂得其解圍力後普屢以兵攻三鄉各相拒無所勝乃退兵先修祖父怨于寧州方攻寧時洪已奉調中原其母集衆曰人犒五金京青布二各守要害賊不得入後洪返謂所予太重責之金諸族目悉解體賊謀知乘之入洪走避撫仙湖孤山州爲殘破歲餘洪復故土鬱鬱死賊次攻石屏州及沙土司等十三長官悉服屬之志欲克維摩州南魯白城卽大舉魯白城在廣南西南七日程

臨安東南九日程與交趾界城天險爲白筵所踞名勝常曰
進圖中原退守魯白吾無憂矣攻之三年不能克七年九月
忽病死子福遠方九歲妻萬氏多權畧威行遠近當事者姑
以撫了局釀禍至今自臨安以東廣西以南不復知有明官
矣至今臨安不敢一字指斥旅人詢及者輒掩口相戒府州
文移不過虛文予過安莊見爲水西殘破者各各有同仇志
不惜爲致命而此方人人沒齒無怨言不意一婦人威畧乃
爾南包沙土司抵蒙自縣北包彌勒州抵廣西府東包維摩
州抵三鄉縣西抵臨安府皆其橫壓之區東唯三鄉何天衢
西唯龍鵬龍在田猶與抗鬪餘皆聞風懼伏有司爲之籠絡
仕紳受其羈勒者十八九王侂以啟釁被逮後人苟且撫局
舉動如此朝廷可謂有人乎夫仇之罪在悞用周世昌不諳
兵機彌連數月兵久變生耳當時止宜責其遲留策其後效
臨敵易帥且不可遽就軍中逮之亦太甚矣嗟乎朝廷於東
西用兵事事如此不獨西南筵也

滇遊日記二

戴八月初七日余作書投畧府何別駕求廣西府志是日其
誕辰不出堂書不得達入堂閱其四境圖見盤江自其南界
西半入境東北從東界之北而去不標地名無從知其何界
也

初八日何收書欲相見以雨不往。

初九日余令顧僕辭何不見促其志彼言卽送至而終不來是日復大雨不止。

初十日何言覓志無印就者已復命殺青矣是日午霽始見

黃菊大開。

菊惟黃色不大又有西番菊

廣西府西界大山高列如屏直

亘南去曰草子山西界卽大麻子嶺從大龜來者東界峻逼

而西界層疊北有一石山森羅於中連絡兩界曰發果山東

支南下者結爲郡治西支橫屬西界者有水從穴湧出甚巨

是爲瀘源經西門大橋而爲矣邦池之源者也。

通海從穴湧出此海亦從

穴湧出然此海南山復橫截仍八大守塘山穴中尤爲異也廣福僧言此水入穴卽從竹園邨北龍潭出未知果否恐龍

迹記

五册上

七

潭自是錫剛北塢水此未必合出也矣邦池俗名海子又曰龍甸此瀘江非廣中瀘江也瀘江在南而此水亦竊其名

不知矣邦池之南復有遠山東西橫屬則此中亦一南北中

窞之坑而水則去來皆透於穴矣此郡山之最遠者也發

果山圓若貫珠橫列郡後東下一支曰奇窞峰則學宮所托

西下一支曰鐵龍峰則萬壽寺所倚而郡城當其中環處城

之東北亦有一小石峰在其中曰秀山上多突石前可瞰湖

後可攬翠城南瀕湖復窞三峰東卽廣福曰靈龜山中峰最

小曰文筆峰建塔於上而西峰橫若翠焉。

卽名翠屏

此郡山之近

者也秀山前有伏波將軍廟後殿爲伏波像前殿爲郡守張

繼孟祠。

張扶風人以甲科守此王申爲普酋因城岌岌矣張奮不顧身固保城隍普莫能破城得僅存先是張夢

馬伏波示以方畧後遂退賊二月終親蒞息寧

新寺卽舊壽寺

河招撫焉州人服其膽畧賊稱爲捨命王云
當發果西垂之南其後山石嶙峋爲滇中所無其寺南向後
倚峭峰前臨遙海亦此中勝處前有玉皇閣東爲城隍廟俱
在城外 瀘源洞在城西北四里新寺後山西盡環塢而北
其中亂峰襍沓綴以小石岫皆削瓣駢枝標青點翠北環西
轉而瀘源之水湧於下穴瀘源之洞闢於層崖有三洞焉上
洞東南向前有亭下洞南向在上洞西五十步皆在前山之
南崖後洞在後山之北岡其上如管井從井北墜穴而下二
十步底界而成春一穴東北下而小一穴東南下而廓此三
洞之分向也其中所入皆甚深秉炬穿隘屢起屢伏乳柱紛
錯不可窮詰焉

遊記 五冊上
滇二

十二

十一日大霽上午出西門過城隍廟玉皇閣前西一里轉新
寺西峰之嘴而北又北一里見西壑漲水盈盈而上洞在其
西北矣由岐路一里抵山下歷級遊上洞望洞西有寺殿兩
重入憩而淪水爲餐余因由寺西觀水洞還寺中索炬始知
爲洞有三洞皆須火深入下午強索得炬而火爲顧僕所滅
遍覓不可得遙望一邨在隔水之南漲莫能達遂不得爲深
入計聊一趨後洞之內披其外巖還入下洞之底探其中門
而已仍從舊路歸北入新寺抵暮而返

十二日早促何君志猶日卽送至坐寓待之擬一至卽行已

而竟日復不可得晚謂顧僕曰志現裝釘俟釘成帙卽來候也 余初以爲廣西郡人必悉盤江所出通微之終無諳者其不知者反謂西轉彌勒旣屬顛倒其知者第謂東北注羅平經黃草壩下卽莫解所從矣問有謂東南南下廣南出田州亦似揣摩之言靡有確據也此地至黃草壩又東北四五日程余欲從之以此中淹留日久迤西之行不可遲姑留爲歸途之便 廣西府鸚鵡最多皆三鄉縣所出然止翠毛丹喙無五色之異 三鄉縣乃甲寅蕭守所城 維摩州州有流官戡居郡城不往州治二處皆藉向天衢守之以與普拒廣福寺在郡城東二里吉雙鄉在矣那池之東南與之對而

遊記 五册上
滇二

十三

彌勒州在郡西九十里一統志乃注寺在彌勒東九十里鄉爲彌勒屬何耶豈當時郡無附郭三州各抵其前爲界故以屬之彌勒耶然今大麻子哨西何以又有分界之址也

十三日中夜聞雷聲達旦而雨初余欲行屢矣而日復一日待之若河清焉 自省至臨安皆南行自臨安抵石屏州皆西北自臨安抵阿迷皆東北自阿迷抵彌勒皆北行自彌勒抵廣西府皆東北

十四日再令顧僕往促志余束裝寓中以待乍雨乍霽上午得回音仍欲留至明晨云乃攜行李出西門入玉皇閣閣頗宏麗中乃銅像而兩廡塑羣仙像極有生氣正殿四壁畫亦

精工遂過萬壽寺停行李於其右廡飯後登寺左鐵龍峰之脊石骨稜稜皆龍鱗角象也

志又稱爲天馬峰以其形似也

既下還寺中見

右廡之北有停柩焉詢之乃吾鄉徽郡游公柩也游諱大勳任廣西三府征普時游率兵屯郡南海稍以防寇之衝寇四年四月普兵忽乘之游竟沒於陣今其子現居其地不得歸故停柩寺中余爲慨然是晚遇李如玉楊善居諸君作醮寺中屢承齋餉僧干松亦少解人意是晚月頗朗

十五日余入城探游君之子令顧僕往促何君上午出西門遊城隍廟既返寺寺中男婦進香者接踵有吳錫爾者亦以進香至同楊善居索余文各攜之去約抵暮馳還抵午顧僕

遊記

五册上
滇二

十四

聞言何君以吏釘志久遲撲數板限下午卽備料不過期矣下午何命堂書送志及程儀至余作書謝之是晚爲中秋而晚雲密布既暮而大風忽吼僧設茶於正殿遂舖飯而卧

十六日雨意霏霏不能阻余行色而吳楊文未至令顧僕往索之既飯楊君攜酒一樽肴以油餅熏鳧乃酌酒而攜鳧餅以行從玉皇閣後循鐵龍東麓而北一里登北山而上一里逾其峒卽發果山之脊也志又謂之九華山蓋東峰之南下者爲奇鶴爲學宮所倚西峰之南下者爲鐵龍爲萬壽寺之脈中環而南突於城中者爲鍾秀山其實一山也從嶺上平行又北三里始見瀘源洞在西而山脊則自東界大山橫度

而西屬於西界爲郡城後倚然瀘源之水穿其西穴而出亦不得爲過脉也從嶺北行又五里而稍下有峭在塢之南岡曰平沙峭郡城北之鎖鑰也其東卽紫微之後脉猶屏列未盡其西則連峰蜿蜒北自師宗南下爲阿盧山界塢中之水而中透瀘源者也由峭前北行塢中六里有溪自北而南小石梁跨之是爲矣各橋溪水發源於東嶺分支處由梁下西注南轉塢窮而南入穴出於瀘源之上流也又北六里有邨在西山之半溪峽自東北來路西北上山三里躡嶺而上二里遂逾西界之脊於是瞰西塢行塢中水浸成壑有邨在其下其西復有連山自北而南與此界又相持成峽焉從嶺上

遊記 五册上 滇一

又北四里乃西北下西峽中二里抵麓復循東麓北行十五里復有連岡屬兩界之間有數家倚其上是爲中火鋪有公館焉按志師宗南四十里有額勒峭當卽此矣飯仍北行峽中其內石峰四五離

立崢嶸峽西似有溪北下路從峽東行兩界山復相持而北塢中皆荒茅沮洳直抵師宗寂無片椽矣聞昔亦有邨落自普與諸彝出沒莫禁民皆避去遂成荒徑廣西李翁爲余言師宗南四十里寂無一人皆因普亂民不安居龜山督府今

亦有普兵出沒路南之道亦梗不通一城之外皆危境云龜山爲秦土官寨其山最高爲彌勒東西山分脉處其西卽北屬陸涼西屬路南爲兩州間道向設督捕城今漸廢弛秦土官爲昂土官所殺昂復爲普所擄今普兵不時出沒其地人不敢行往路南徵江者反南迂彌勒從北而向革泥關焉蓋自

廣西郡城外皆普氏所屬服卽城北諸邨小民稍溫飽輒坐
派其費以供如違卽全家擄掠而去故小民寧流離四方不
敢一鳴之有司以有司不能保其命而普之生殺立見也
北行二十里經塢而西從塢中

度一橋有小水自南而北涉之轉而西北行顯色已合顧僕

後余從一老人一童子前行躑躅昏黑中余高聲呼顧僕老

人輒搖手禁止蓋恐匪人聞聲而出也循坡陟峒十里有一

尖峰當峒中穿其腋復西北行其處路甚灣蹊水交流路幾

不辨後不知顧僕趨何所前不知師宗在何處莽然隨老人

行而老人究不識師宗之遠近也老人初言不能抵城隨路

得輒并不得師宗余還叩之老人曰余昔過此久之漸聞犬

吠聲隱隱真如空谷之音知去人境不遠過尖山共五里下

遊記五册上
滇二

十六

涉一小溪登坡遂得師宗城焉抵東門門已闕而外無人家

循城東北隅有草茅數家俱已熟寢老人仍同童子去余止

而謀宿莫啟戶者心惶惶念顧僕負囊山荒路寂泥濘天黑

不知何以行且不知從何行久之見暗中一影亟呼而得之

而後喜可知也旣而見前一家有火趨叩其門始固辭余候

久之乃啟戶入淪湯煮楊君所貽粉糕啖之甘如飴也濯足

藉草而臥中夜復聞雨聲王人爲余言今早有人自府來言

無之曰可徵君之福也土人與之相識猶被索肥始放君之

不遇豈偶然哉卽此地外五里尖山之下時有賊出沒土人

未晚卽不敢行何幸而昏夜過之師宗在兩山峽間東北與西南俱有山
環夾其塢縱橫而開洋不整亦不大水從東南環其北而西

去亦不大也。城雖磚甃而甚卑。城外民居寥寥。皆草廬而不見一瓦。其地峭守之兵亦俱何天衢所轄。城西有通元洞。去城二里。又有透石靈泉。俱不及遊。

十七日晨起。雨色霏霏。飯而行。泥深及膝。出門卽化。北行一里。有水自東南塢來。西向注峽而去。石橋跨之。爲緣生橋。過橋行塢中一里。北上坡。遵坡行八里。東山始北斷成峽。水自峽中西出。有寨當峽而峙。不知何名。余從西坡北下。則峽水西流所經也。坡下亦有茅數家。爲往來居停之所。是曰大河口。河不甚巨。而雨旁沮洳特甚。有石梁跨之。與緣生同。其水勢亦與緣生相似。過橋北行。度塢塢北。復有山自東北橫亘。

遊記 五册上

滇二

十七

西南一里。陟其坡。循之東。向行三里。越坡東下。塢中沮洳。有小水自北而南。入大河溪。上流有四五人索哨。錢於此。因架木爲小橋以渡。見余。不索哨。而乞造橋之犒。余畀以二文。各交口稱謝。旣渡半里。余隨車路東行。諸人哄然大呼。余還顧。則以羅平大道。宜向東北。余東行爲悞。故也。亟還從東北半里。復上坡東行。於是皆荒坡遙隴。夙霧遠迷。重茅四塞。十五里。東逾岡。始望見東北岡上。有寨一屯。其前卽環山成窪。中有盤壑。水遶其底。而成田。廻陞四顧。皆高。不知水所從出。從岡東下一里。越塢中細流。其塢與流皆自南而北。卽東通盤壑者。又東上一里。循壑之南脊行。與所望北岡之寨。正隔塢。

相對矣。又逾東岡稍下一里，則盤壑之東有峽穿隴而至。其峽自東南大山破壁而至者，峽兩崖皆亘壁其上，或中剖而成峽，或上覆而成梁。一塢之中，條斷條續，水亦自東南流穿盤壑。但壑中不知何洩，時余從石梁而度，水流其下，不知其爲梁也。望南北峽中水一從梁洞出一從梁洞入，乃從梁東選石踞勝，瞰峽而坐，睇其下如連環夾壁，明暗不一。曲折透空，但峽峭壁削無從下穿其穴耳。於是又東愈岡塢相錯，再上再下八里，盤嶺再上，至是夙霧盡開，北有削崖近峙，南有崇嶺遙穹，取道其間，橫陟嶺脊，始逼北崖旋向南嶺，二里復逾高脊，北轉東下，二里有茅當兩峰峽間，前植峭竿，空而

遊記 五册上
滇二

十八

無人，是曰張飛峭，山中之最幽險處也。又東下三里，懸壑深闊，草木蒙密，泥濘及膝，是名偏頭峭，峭不見居廬，路口止有一人懸刀植鎗而索錢，余不之與而過。此峭之南卽南穹崇嶺，羅平賊首阿吉所窟處，爲中道最險，故何兵峭守焉。又名新峭，而師宗界止此矣。過峭又東上嶺，嶺更峻，石骨稜厲，二里躋其巔，是爲羅平師宗之分界，亦東西二山之分界也。嶺重山複，上下六十里，其山蓋南自嶺度脉，分支北下，結成崇險峻，爲迤東之冠。

嶺北度此春，而爲白蠟、束龍而東，盡於河底盤江交會處者也。從嶺上東向平行，其間多墜壑成窞，小者爲罅，井大者爲盤窞，皆叢木其中，密不可窺，而峰頭亦多樹多石，不若師宗

皆土山茅脊也。平行嶺上五里，路左有塲，宿火樹間，是爲中火鋪。乃羅平師宗適中之地。當年有土人擔具攜炊，賣飯於此。而旣過時輒去，余不及矣。乃冷餐所攜飯，又東一里，漸下。又一里，南向，下叢中，其路在箐石間，泥濘彌甚。一里，遂架木爲棧，嵌石隙中，非懸崖沿壁，而或斷或續。每平鋪當道，想其下皆石孔，胥井，故用木補填之也。又東下一里，始出峽口。迴顧西壑崇嶺，高懸皆叢箐密翳，中有人聲，想有爨人之居。而外不能見。東眺則南界山岡平亘，北界則崇峰屏立，相持而東。於是循北坡東行，三里復北上坡，直抵北界峰腰，緣之。三里，峰盡，東下有塲縱橫。一塲從北峽來，一塲從東峽來。

遊記

五册上
滇二

十九

塲從西峽來，一塲向東南去。時雨色復來，路復泥濘，計至羅平，尙四十里，行不能及。聞此中有營房一所，可宿，欲投之。四顧茫無所見，祇從大道北轉入峽，遂緣峽東小嶺而上。一里，忽遇五六人持矛挾刃而至。顧余曰：行不及州矣。予問營房何在，曰：已過。可宿乎？曰：可。遂挾余還。蓋此輩卽營兵，乃送地方巡官過嶺而返者。仍一里下山，抵塲中，乃向東塲八半里，抵小峰之下，南向攀峰而上，峻滑不可着足。半里登其巔，則營房在焉。營中茅舍如蝸，上漏下濕，人畜雜處，其人猶沾沾謂子公貴人，使不遇余輩，而前無可托宿，奈何。雖營房卑隘，猶勝爨居十倍也。

爨，謂黑白，
籩與糲。

余領之，索水炊粥，峰頭水甚艱。

以一掬濯足而已。

十八日。平明。雨色霏霏。余謂自初一漾田晴後。半月無雨。恰中秋之夕。在萬壽寺。狂風釀雨。當復有半月之陰。營兵曰。不然。予羅平自月初卽雨。並無一日之晴。蓋與師宗隔一山。而山之西。今始雨。山之東。雨已久甚。乃此地之常。非偶然也。余不信。飯後下山。

飯以筍爲案。筍出山筍。深處。八月正其時也。

溽滑更甚於昨。而濃

霧充塞。較昨亦更甚。一里抵昨所入塢中。東北上一里。過昨所返轍處。又一里。逾山之岡。於是或東或北。盤旋嶺上。八里稍下。有泉一縷。出路左石穴中。其石高四尺。形如虎頭。下層若舌之吐。而上有一孔如喉。水從喉中溢出。垂石端而下。墜

遊記 五冊上
滇二

三

喉孔員而平。僅容一拳。盡臂探之。大小如一。亦石穴之最奇者。余時右足爲汚泥所染。以足向舌下。就下墜水濯之。行未幾。右足忽痛不止。余思其故而不得。曰。此靈泉而以濯足。山靈罪我矣。請以佛氏懺法。鮮之。如果神之所爲。祈十步內痛止。及十步而痛忽止。徐行山中。不喜語怪。此事余所親驗。而識之者。不敢自諱。以沒山靈也。從此漸東下。五里抵一盤壑。中有小水自北而南。四圍山如環堵。此中窪之底也。豈南流亦透穴而去者耶。又上東岡。二里逾岡。又東下一里。行塢中者三里。有小水自西北向東南。至是始遇明流之澗。有小橋跨之。旣度澗。從東南去。路復東上岡。三里逾岡之東。始見東

塢大闢自南而北東界則遙峰森嶺

志稱羅莊山

駢立東南西界

則崇嶽巍峩

志稱白蠟山

屏峙西北東北又有一山

土人稱爲橫東龍山

排於兩界缺處而猶遠不睹羅平城近莫見興哆囉也

興哆囉卽

在山下以嶺峻不能下瞰耳

又東稍下者二里峻下者一里遂抵塢中則

興哆囉茅舍數間倚西山東麓焉從此遂轉而北行塢中其

塢西傍白蠟東瞻羅莊南去甚遙則羅莊自西界老脊分枝

而東環處也塢中時有土岡自西界東走又有石峰自東界

西安路依西界北行遙望東界遙峰下峭峰離立分行競穎

復見粵西面目蓋此叢立之峰西南始于此東北盡于道州

磅礴數千里爲西南奇勝而此又其西南之極云過興哆囉

遊記

五册上
滇二

二七

北一重土岡東走卽有一重小水隨之想土岡之東有溪北

注以受此諸水數涉水逾岡北五里望西山高處有寨聚居

頗衆此囉囉寨也又北二里有池在東岡之下又北二里有

池在西岡之下皆岡塢環轉中窪而成者又北三里有水成

溪自西而東向注甚急一石梁跨之是爲魯藥橋橋下水東

南數里入穴中越橋北始有夾路之居又北半里有水自西

而東注其水不及魯藥之半卽從上流分來亦東里餘而滅

亦一石梁跨之二水同出於西門外白蠟山麓龍潭中分流

城東南而各墜地穴亦一奇也橋之南始有盈禾之塍又北

半里入羅平南門半里轉東一里出東門停憩於楊店是日

爲東門之市既至而日影中露市猶未散因飯於肆觀於市
市新榛子薰鷄蓼還楊店而雨濛濛復至時有楊婿姜渭濱
者荊州人贅此三載矣頗讀書知青鳥術詢以盤江曲折能
隨口而對似有可據者先是余過南門橋有老者巾服而踞
橋坐見余過拉之俱坐予知其爲土人因訊以盤江彼茫然
也彼又執一人不訊其人謂由激江返天上可笑也渭濱言
盤江南自廣西府流東北師宗界入羅平之東南隅羅莊山
外抵八達義寨會江底河經巴澤河格巴吉與龍那貢至壩
樓爲壩樓江遂東南下田州不北至黃土壩亦不至普安州
第壩樓諸處與普安界亦相交錯是南盤亦經普安之東南

遊記 五册上
滇二

二十三

界特未嘗與東北之北盤合耳 羅平在曲靖府東南二百
餘里舊名羅雄亦土州也萬歷十三年土酋者繼榮作亂都
御史劉世曾奉命征討驛元道文作率萬人由師宗進夾攻
平之改爲羅平明年繼榮自把董仲文等復叛羈知州何倭
文作以計出之復率兵由師宗進討平之今遂爲迤東要地
羅平州城西倚白蠟山下東南六十里爲羅莊山東北四
十里爲束龍山有水自白蠟麓龍潭出名魯彘河東環城南
出魯彘橋而東入地穴其北有分流小水亦如之此兩界之
水也其西有蛇場河自州西南環州東北抵江底河俱在白
蠟東龍二山外其東南有盤江自師宗東北入境東南抵八

達俱在羅莊山外此外界之水也 州城磚甃頗整州治在

東門內俱民惟東門外頗成闐闐西南二門為賊首官霸仲家

巢在正南八十里獬獬巢在州西南七阿吉十里偏頭南大山下二寇不時劫掠

鳥魯河師宗界 民不能居 白蠟山在城西南十餘里頂高十餘里其麓即

在西門外二里上有尖峰南自偏頭寨北抵州西北為磨盤

山過脉而東又起為東龍山者也此山雖晴霽之極亦有白

雲一縷橫亘其腰如帶圍為州中一景 東龍山在城東北

四十里者繼榮叛時結營其上為巢窟官兵攻圍久之內潰

而破今其上尙有二隘門 羅莊山在城東南六十里其山

參差森列下多卓錫拔笋之岫粵西石山之發軔也 羅平

遊記 五册上 滇二

二十三

州東至廣南八達界二百里西南至師宗州偏頭哨六十里

南至師宗州烏魯河界八十五里西南至陸涼蛇場河界一

百里西北至舊越州界發郎九十里北至亦佐縣桃源界一

百二十里東北至亦佐縣黃草壩二百里 羅平州正西與

滇省對正東與廣西思恩府對正北與平彝衛對正南與廣

西府永安哨對

十九日坐雨逆旅聞廣西府志下午有伍佐李三生來拜

二十日雨阻逆旅

二十一日亦雨阻逆旅

二十二日早猶雨霏霏將午乃霽完濯污衣且補紉之下午

入東門仍出南門登門外二橋觀魯彘河詢之士人始知其
西出白蠟山麓龍潭仍東入地穴者也還入南門上城行抵
西門望白蠟山麓相去僅三里外有土岡一層迴之魯彘發
源卽從其麓透穴而出者也稍北卽東轉經北門其西北則
磨盤山峙焉爲州城來脉城東北隅匯水一塘其下始有禾
畦卽東門接壤矣其城乃東西長而南北狹者也

二十三日晨起陰雲四布飯而後行其街從北去居民頗盛
一里出北隘門有岐直北過嶺者爲發卽道其嶺卽自西界
磨盤山轉而東行者板橋大道從嶺南東轉東北向行十里
有邨在北山之下曰發近德其處南開大塢西南卽白蠟東

遊記

五册上
滇二

二十四

南卽大堡營山大堡營之南一支西轉卓起一峰特立於是
邨之南爲正案其南則石峰叅差遙列卽昨興多羅所望東
南界山也又東屢有小水南去渡之東五里有石峰窾兀當
關北界卽磨盤東轉之山南界卽大堡山諸石峰相奏成峽
而石峰當其中若蹲虎然由其東南腋行南界石山森森成
隊南去而路漸東北上五里出當關峰之東其東垂有石特
立上有斜騫之勢是曰金雞山所謂金鷄獨立也又東一里
一洞在南小峰下時雨陣復來避入其中飯又東三里東上
峽脊其脊卽磨盤山東走脉至此又度而南爲大堡營東山
者也二里逾脊之東其上有岐南去不知往何彘窾脊東環

窪成塢有小水北下注東南塢中稻禾盈廕有數家倚北峰下曰沒奈德東峰下有古殿二重時雨勢大至趨避久之乃隨水下東南峽峽逼路下兩旁山勢仍覺當人面而起東行峽中二里有水自峽南洞穴出與峽水同東注又一里有小石梁跨溪逾之從溪南東行一里溪北注峽路東逾岡一里餘有塢自西北來環而南其中田禾茂或邨落高下東二里有數十家夾路曰山馬羹亦重山中一聚落也於是又東北一里石峰高亘逾其南坡抵峰下又東南一里有塘在山塢五六家傍塢而栖曰挨澤邨又東北二里爲三板橋數家踞山之岡其橋尙在岡下時雷雨大至遂止於岡頭上寨

遊記 五册上
滇二

二十五

二十四日主人炊飯甚早平明卽行雨色霏霏路滑殊甚下坡卽有小石梁其下水亦不大自西而東注乃出於西北石穴而復入東北穴中者其橋非板而石而猶仍其舊名橋南復過一寨乃東向行坡間二里有岐當峽從東北者乃入寨道從直東者爲大道從之直東一里登岡上其北有塢在北大山下卽寨聚所托中有禾芄芄焉岡南小石峰排立岡頭自東而西遂與北山環峙爲峽入峽東行四里逾脊北上半里入其峒其北四峰環合中有平塢經之而北西峰尤突兀焉北半里又穿峒半里復由峽中上一里直抵北巨峰下其峰聳亘危削如屏北障其西有塢下墜北去其中箒深霧黑

望之杳然路從峰南東轉遂與南峰奏峽甚逼披隙而東半里共東四山攢沓峰高峽逼叢木蒙密亦幽險之境也遂循南峰之東南向入塢半里乃東南上半里逾岡脊而東其東有塢東下路從岡頭南向行一里復出南峒其峒東西兩峰從岡脊起路出其側復東向行三里始稍降而復上於是升降曲折多循北嶺行與南山相持成塢六里路從塢而東又五里稍上逾峒南北峽始開再東盤北嶺之南三里始見路旁餘薪爨灰知爲中火之地從其東一里下峽始得石路迤邐南向平行下二里俯見南塢甚杳循北嶺東向行一里忽聞溪聲沸然又南下抵塢中一溪自東而西有石梁跨之溪

遊記 五册上
滇二

二十六

中水頗大而甚急四顧山迴谷密毫無片隙不知東北之從何來不知西南之從何洩當亦是出入於竅穴中者欲候行人問之因坐飯橋上久之不得過者乃南越橋行仰見橋南有岐躡峰直上有大道則溯溪而東時溪漲路淪攀南峰之麓行念自金鷄山東上一路所上者多而下者無幾此溪雖流塢中猶是山巔之水也東一里循南峰東麓轉而南隔塢東望溪自東北峽中破崖而出其內甚逼路捨之南半里復循南峰南麓轉而西向入塢一里塢窮遂西上嶺一里逾嶺頭始見有路自北來合并由嶺上南去此卽橋南直上之岐逾高嶺而下者較此爲逕直云由嶺南行西瞰塢甚深而等

密泉沸亦不辨其從何流也。又南二里轉而東，循北嶺南崖東向行，亦與南山下夾成塢。下瞰深窅，與西塢同。東五里，其塢漸與西塢益始知山從東環塢，乃西下者。又東向逾岡，東北一里，度一脊，其脊東西度，從其東復上嶺。一里，則嶺東有塢，南北闕，乃北轉循西山行塢上。一里，塢窮，從塢北平轉，逾東嶺之東，共二里，有數家在路北坡間，是曰界頭寨。以羅平邨落東止於此也。又東行岡上二里，再上嶺一里，逾而東，則有深峽，下嵌，惟聞水聲，湓湧而不見水。從嶺上轉而南行，東瞰東界山麓，石崖懸削，時窅於松柏箐影中，而不知西界所行之下。其崖更聳也。南行一里，始沿崖南下。又一里，仰見路

遊記 五册上
滇二

二十七

西之峰亦變而爲穹崖峭壁，極危峻之勢焉。從此瞰東崖之下，江流轉曲，西南破壁去，隔江有茅兩三點，倚崖而居，乃東向拾級直下。一里，瞰江甚近，而猶未至也。轉而北，始見西崖，矗立插天，與東崖隔江對峙。其崖乃上下二層，向行其上，止見上崖而不得下，見亦不得下，達故必迂而南，乃得拾級云。北經盡崖下半里，下瀨江流，則破崖急湧，勢若萬馬之奔馳。蓋當暴漲時也。其水發源於師宗西南龍擴北，合陸涼諸水爲蛇場河，山龍甸及羅平舊州，乃東北至伊澤，過東龍山後轉東南抵此，卽西南入峽。又二百里而會入達盤江者也。羅平普安以此江爲界，亦遂爲滇東黔西分界焉。有舟在江東

潁呼之莫爲出渡者薄暮雨止始有一人出曰江漲難渡
多人操舟乃可不過乘急爲索錢計耳又久之始以五人划
舟來復不近涯以一人涉水而上索錢盈壑乃以舟受已昏
黑矣雨復淋漓截流東渡登涯入旅店店主人他出其妻黠
而惡見渡舟者乘急取盈亦尤而效之先索錢而後授餐餐
又惡而鮮且嫚褻余蓋與諸少狎而笑余之老也此婦奸腸
毒手必是馮文所所記地羊寨中一流人幸余老不爲所中
耳江底寨乃獾獾止此一家歇客爲漢人其人皆不良如
獾獾之要渡漢婦之索客俱南中諸夔境所無者其地爲步
雄屬乃普安十二營長官所轄也土酋龍姓據土人曰今爲
僂姓者所奪步雄之界東抵黃草壩二十里西抵此江六十
里南抵河格爲廣南界一百餘里北至本司十二營界亦不
下三四十里亦中原一小邑也

遊記 五册上
滇二

二十八

二十五日其婦平明始覓炊遲遲得餐雨時作時止出門卽
東上嶺蓋其江自北而南兩崖夾壁惟此西崖有一線可下
東崖有片隙可廬其南有山橫列江折而西向入峽有小水
自東峽來注故西崖之南江勒而無餘地東崖之南曲轉而
存小勝乃知步雄之地西南隨此江其界更遠南抵廣南其
界卽盤江此統志所云東入普安州境也
步雄屬貴州普安州 盤旋東
北共三里逾嶺頭遂與南山成南北兩界峽中深逼自東而

西路循北山嶺南行自西而東又五里則北山忽斷如中剖者下陷如深坑底有細流沿石底自北而瀉於南峽路乃轉北而下歷懸石披仄磴下抵石底踐流稍南復攀石隙上躋東崖由石底北望斷崖中剖對夾如一綫並起各千仞叢翠披雲飛流濺沫真幽險之極觀逼仄之異境也既上復循北嶺東行五里稍降行塢中二里於是路南復有峰突起不沿南塢忽穿北岫矣時零雨間作路無行人旣而風馳雨驟山深路僻兩人者勃率其間覺樹影溪聲俱有靈幻之氣又三里度東脊稍轉而南復逾岡而上二里一岐東南一岐直北顧奴前馳從東南者穿山腋間二里忽見數十家倚北塢間

遊記

五册上
演二

三九

余覺有異趨問之則大路尙在北大山後此乃山中別聚皆羅羅也見人偃偃間有解語者問其名曰坡頭甸問去黃草壩曰尙五十里問北出大路若干里曰不一里蓋其後有大山北列最高抱此甸而南若隔絕人境者隨其指逾嶺之西北腋果一里而得大道遂從之緣大山之北而上直躋者二里望北塢甚深而闌霍開樹杪每竚視之惟見其中叢茅盤谷闌無片隘半椽也盤大山之東又上半里忽見有峽東墜稍東南降半里平行大山東南支又見其西復有峽南墜已與大山東西隔隴矣於是降陟嶺塢十里有兩三家居北岡之上是曰柳樹止而炊湯以飯而雨勢不止訊去黃草壩不

及遂留止焉其人皆漢語非羅羅居停之老陳姓甚貧而能重客一見麵煨楮糊以療濕衣余浣汚而炙之雖食無鹽臥無草甚樂也

二十六日平明起炊飯夙霏飄雨余仍就火久之乃行降坡循塢其塢猶西下者東三里塢窮有小水自北塢來橫渡之復東上坡宛轉嶺峻五里有塢在北坡下由其東又五里適岡而下塢忽東西大開其西南岡脊甚平而東北若深墜南北皆巨山而南山勢尤崇黑霧間時露巖巖氣色塢中無巨流亦無田墜居人一望皆深茅充塞路本正東去有岐南向崇山之腋顧奴前馳從之一里南竟塢將陟山坡上余覺其

遊記

五册上
滇二

三十

悞復返轍而北從大路東行披茅履濕三里東竟塢有峰中峙塢東塢從東北墜而下路從東南陟而上二里南穿山腋又東半里逾其東岫俯見東山南向列下界爲峽其中泉聲轟轟想爲南流者從嶺上轉南半里逾其南岫又俯見西山南向列下界爲峽其中泉聲轟轟想亦南流者蓋其東西皆有層巒夾谷而是山中懸其間遂從其西沿嶺南下二里有小水自東崖橫注西谷遂踞其上灌足而飯既飯從塢上南行隔塢見西峰高柯叢蔓蒙密無纖隙南二里塢將盡聞伐木聲則掄材取薪者從其南漸北焉又南一里下至塢中則塢乃度脊雖不甚中高而北面反下脊南峽南下甚逼中滿

田禾透峽而出遂盤一壑豐禾成厓有小水自東北峽下注南有尖峰中竅水從其西南墜去路從其東北逾嶺一里半涉壑一里半登嶺又東俯有峽南下其中水聲甚急拾級直下一里抵塢底東峽水西南注遂橫涉之稍南又東峽一水自東而西注復橫涉之二水遂合流南行路隨澗東而南二里出峽有巨石聳竅立東南水從塢中直南去塢中田塍鱗次黃雲被隴西瞻步維止隔一嶺路從塢東上嶺轉竅峰之南二里有數家倚北岡正是曰沙澗邨始知前所出塢爲沙澗也由其前東下而復上又東南逾一岡而下共一里餘有溪自北而南較前諸流爲大其上有石梁跨之過梁復東上

遊記 五册上
滇二

三十一

坡一里岡頭石齒縈泥滑濘廉利備諸艱楚一里東下又東南轉逾一岡一里透峽出始見東小山南懸塢中其上室廬纍纍是爲黃草壩乃東行田隙間一里遂經塢而東有水自北塢來石坡橫截之坡東隙則疊石齊坡水冒其上南瀉而下其水小於西石梁之水然皆自北而南抵巴吉而入盤江者也自沙澗至此諸水俱清澈可愛非復潢污渾濁之比豈滇黔分界而水卽殊狀耶此處有石瀨而復甃堰以補其缺東上卽爲黃草壩營聚壩之得名豈以此耶時樵者俱浣濯壩上亦就濯之汚衣垢膝爲之頓易乃東上坡循堵垣而東有街橫縈岡南然皆草房卑舍不甚整闢

土人言前年爲步
雄龍土司挾其威

沙土司兵攻敗故非復舊觀然龍氏又爲儂氏所攻而代之矣其北峰頂卽土司黃氏之居在焉乃入息於吳氏吳漢人男婦俱重客蔬禮俱備云

二十七日晨起雨猶不止旣而霽泥濘猶甚姑少憩一日詢

盤江曲折爲明日行計乃匡坐作記薄暮復雨中夜彌甚衣

被俱沾透焉

二十八日晨雨不止衣濕難行俟炙衣而起終日雨濛濛也

是日此處馬場人集頗盛市中無他異物惟黃蠟與細笋爲

多乃煨筍煮肉竟日守雨

黃草壩土司黃姓如都司銜

乃普安

十二營長官司之屬十二營以歸順爲首而錢賦之數則推

黃草壩土地之遠則推步雄焉

黃草壩東十五里爲馬鼻

遊記 五册上 滇二

三十一

河又東五十里抵龍光乃廣西右江分界西二十里爲步雄

又西五十里抵江底乃雲南羅平州分界南三十里爲安障

又南四十里抵巴吉乃雲南廣南府分界北三十里爲豐塘

又北二十里抵碧洞乃雲南亦佐縣分界東西南三面與兩

異省錯壤北去普安二百二十里其地固隘中闊道路四達

人民頗集可建一縣而土司恐奪其權州官恐分其利莫爲

舉者 黃草壩東南由龍光箐口者恐板屯壩樓

以上俱安隆土司地

其土官自天啟初爲部人所殺泗城以孫代署之

八蠟者香州地

下田州乃昔年

大道自安隆無土官泗城代署廣南以兵爭之據其大半道

路不遺實由於此

按盤江自入達

與羅平

巴澤河格巴吉

興隆那貢

以上俱安隆土司地今俱為廣南有

抵壩樓遂下入蠟者香又有一

水自東北來合土人以為即安南衛北盤江恐非是安南北盤合膽寒羅運白水河之流已東南下都泥由泗城東北界

經那地永順出羅木渡下遷江則此東北來之水自是泗城西北界山箐所出其非北盤可知也於是遂為右江再下又有廣南富州之水自者格

亦安隆土司屬今為廣南據者

葛閩歷裏

俱泗城州地

來合而下田州此水即志所稱南旺諸溪也二水一出泗城西北一出廣南之東皆右江之支而非右江之源其源惟南

盤足以當之膽寒羅運出於白水河乃都泥江之支而非都泥江之源其源惟北盤足以當之各不相紊也按雲南抵

遊記 五册上 滇二

廣西間道有三一在臨安府之東由阿迷州維摩州

本州昔置乾溝

倒馬坡石天井阿九抹甲等哨東通廣南每哨撥陸京衛百

戶一員軍兵十五名民兵十五名把守後州治湮沒哨悉廢

弛見有府志可攷抵廣南富州入廣西歸順下雷而出馱伏下南寧

此余初從左江取道至歸順而卒阻於交彝者也是為南路一在平越府之南由獨山州豐寧上下司入廣西南丹河池

州出慶遠此余後從羅木渡取道而入黔滇者也是為北路

一在普安之南羅平之東由黃草壩即此安隆壩樓之下田

州出南寧者余初徘徊於田州界上人皆以為不可行而久

候無同侶竟不得行者也是為中路中路為南盤入粵出黔

之交南路為南盤縈滇之始與下粵之末北路為北盤經黔

環粵之會然此三路今皆阻塞南阻於阿迷之普富州之李

沈見廣西小紀歸順之交彘中阻於廣南之蠶食田州之狂狷北

阻於下司之草竊入寨之伏莽既宦轍之不敢入亦商旅之

莫能從惟東路由沅靖而越沙泥□□□□恐州爲今人所

趨然懷遠沙泥亦多黎人之恐且迂陟湖南又多歷一省矣

黃草壩東一百五十里爲安籠所又東爲新城所皆南與

粵西之安隆泗城接壤然在黔曰籠在粵曰隆一音而各異

字一處而各異名何也豈兩名本同一字傳寫之異耶按安

莊之東大路所經亦有安籠箐山與安籠所相距四百里乃

遠者同而近者異又何耶大抵黔中多用籠字粵中多用隆

遊記 五册上 滇二

三四

字如隆安縣之類故各從其地而不知其地之相近其取名必非二

也 黃草壩著名黔西而居聚闔閭俱不及羅平州羅平著

名迤東而居聚闔閭又不及廣西府此府州營堡之異也聞

徵江府湖山最勝而居聚闔閭亦讓廣西府臨安府爲滇中

首郡而今爲普氏所殘凋敝未復人民雖多居聚雖遠而光

景止與廣西府同也 迤東之縣通海爲最盛迤東之州石

屏爲最盛迤東之堡聚寶秀爲最盛皆以免於普禍也縣以

江川爲最獨州以師宗爲最敵堡聚以南莊諸處爲最慘皆

爲普所蹂躪也若步雄之龍儂爭代黃草壩之被闕於龍沙

沙乃步雄龍 安隆土司之紛爭於岑儂 岑爲廣西泗城儂爲 廣南府今廣南勢大

安隆之地爲土司糜爛人民乃其本性而紊及朝廷之封疆
占去八九矣

不可長也 諸彝種之苦於土司糜爛真是痛心疾首第勢
爲所壓生死惟命耳非真有戀主思舊之心牢不可破也其
所以樂於反側者不過是遺孽煽動其人不習漢語而素昵
蠻風故勾引爲易而遺孽亦非果有殷之頑田橫之客也第
跳梁伏莽之奸藉口愚衆以行其狡獪耳 所度諸山之險

遠以羅平師宗界偏頭哨爲最其次則通海之建通關其險

峻雖同而無此荒寂再次則阿迷之中道嶺沈家
坎處其深杳雖

同而無此崇隘又次則步雄之江底東嶺其曲折雖同而無

此逼削若溪渡之險莫如江底崖削九天塹嵌九地盤江朋

遊記 五册上
滇二

圍之渡皆莫及焉 粵西之山有純石者有間石者各自分

行獨挺不相混雜滇南之山皆土峰繚繞間有綴石亦十不

一二故環窪爲多黔南之山則界于二者之間獨以逼聳見

奇滇山惟多土故多壅流成海而流多渾濁惟撫仙
湖最清 粵山惟

石故多穿穴之流而水悉澄清而黔流亦界於二者之間

二十九日晨雨霏霏既飯辭主人行從街東南出半里遶東

峰之南而北入其塢竚而廻眺始見其前大塢開於甌擊山

叢窾小石峰或朝或拱叅立前塢中而遙望塢外南山橫亘

最雄猶半與雲氣相氤氳此卽巴吉之東障盤江而南趨者

也塢中復四面開塢西則沙澗所從來之道東則馬鼻河所

從出之峽而南則東西諸水所下巴吉之區北則今所入豐塘之路也許其地北與口口口爲對南與富州爲對西與楊林爲對東與安籠所爲對其遙對者直東則粵西之慶遠直北則四川之重慶矣入北塢又半里其西峰盤崖削石巖巖獨異其中有小水南來湖之北又二里循東峰北上逾脊稍降陟塢復上始見東塢焉其二里再上北坳轉而西坳中有水自西來出坳下墜東塢坳上豐禾被隴透之而西沿北嶺上西向行二里稍降陟北塢一里復西北上二里逾北坳從嶺脊西北行塗中忽雨忽霽大抵雨多于日也稍降復盤陟其西北坡剛左右時有大窪旋峽其五里逾西坳而下又三

遊記 五册上
滇二

三十六

里抵塢中聞水聲淙淙然四山迴合方疑水從何出又西北一里忽見塢中有坑中墜如井此水之所入者矣從塢右半里又西北陟嶺半里透脊爽而出於是稍降從長峽中行西北三里復稍上始知此峽亦中窪而無下洩之道者也飯於路旁石上出嶺之西始見西塢中盤岡皆嘉禾芄芄北有小山縉塢口廬舍懸其上是曰豐塘東西南皆迴峰環之水從西南二塢交注其間北向墜峽由塢東南降嶺循塢南盤南山北麓共二里北與縉口廬舍隔塢相對見路旁有岐南向入山疑爲分岐之處適而復還始登見其內道頗大以爲是再上路分爲二西者旣漸小南者又盤南山又疑爲非往復

數四莫可從問。而塢北居廬相距二里餘。往返既遙。見南山有牧者。急趨就之。而隔峰間壑。不能卽至。忽有負木三人。從前嶺下。問之。乃知其非。隨之。二里北出大路。其人言分岐之處。尙在嶺西。此處南岐。乃南塢小路之入山者。大路在西。塢入也。然此去已不及黃泥河。正可從碧峒托宿矣。乃西向入塢。有小水自西來。路逾坡西上。下而復陟。三里逾坳。均不高。而接兩山之間。爲南山過北之脊。東水下豐塘。西水復西北流。俱入馬鼻者。脊西遙開塢。直去循北嶺。又西二里。岐始兩分。沿北嶺西向出塢。爲普安州道。橫度塢南。陟嶺南上。爲亦佐道。遂南度塢。路漸微。深茅覆水。曲磴欹坡。無非行潦。緣之

遊記
五册上
演二

三七

南上坡。一里。西南盤嶺角。始望見北界遙山。橫亘蜿蜒。天末此卽亦字孔。西南東轉之脊。從丹霞山東南。迤邐環狗塢。歸順二營。以走安籠所。北界普安南北板橋諸水。入北盤。南界黃草壩馬鼻河諸水。入南盤者也。又西南入峽。一里餘。復南躋嶺巔。一里。得石磴。由脊南轉。其脊茅深。路曲。非此石道。復疑其悞矣。循磴西下。復轉而南。曲折一里。抵山麓。其麓復開大塢。西去塢。雖大。皆荒茅盤錯。絕無禾黍。人煙於是隨山麓西行。三里。塢直西去。路西南截塢行。塢南北界。巨嶺森削。中環一壑。圓匝合。令人有四面芙蓉之想。惟曠色欲合。山雨復來。而路絕茅深。不知人煙何處。不勝惴惴。又西南一里。穿

遊記第五册下

江陰徐宏祖霞客著

子別姓 李 寄介立 輯

同邑 季夢良會明編

楊名時凝齋閱

後學吳 樞傳詞 族孫徐 鎮筠峪 重校

滇遊日記 三

戊寅九月初一日雨達旦不休起觀兩界山已出峽口碧峒在西南山下其北山岡上即

紅板橋為貴州界復去黔而入滇高枕一宵矣就火炊飯欲

行至人言此去黃泥河二十里水漲舟莫能渡須少需之蓋

是河東岸無居廬先有去者亦俱反候於此余見雨勢不止

憚于往返乃掃剔片地拭木板為几匡坐斝茅中冷則與藥

遊記 五册下 滇三

婦同就濕焔葢一茅之中東半畜馬西半則主人之榻榻前

就地煨濕薪以為爨爨北即所置几地也與其榻相隔止一

火夜則鋪茅以臥日則傍火隱几雨雖時止簷低外灑不能

一舉首辨羣山也

初二日夜雨仍達旦主人言今日漲愈甚舟益難渡明日為

街子貴州為塲雲南為街子廣西為墟候渡者多彼舟不得不至即余亦同

行也余不得已復從之匡坐如昨日就火煨粥日三斝焉枯

腸為潤是日當午雨稍止忽聞西嶺喊聲寨中長幼俱遙應

而馳詢之則豺狼來負羊也幸救者傷而未死夫日中而覓

獸當道余夜行叢薄中而僥倖無恐能忘高天厚地之靈祐

哉。碧峒在亦佐縣東百里。蓋滇南勝境之界山。南走東轉。

包明月所之南橫過爲火燒鋪南山。按滇南勝境乃分界山也。而老春尙在其東。火

燒鋪西嶺。余前過明月所卽平糞所。詢土人言其水南下亦

左。則明月所東火燒鋪西乃爲分水之脊。卽轉爲火燒亦字

孔之南山。東走而北轉經樂民所北達歸順狗場之間。而東

南下安籠所。入廣西泗城州境。又東過思順府北東峙爲大

明山。而盡于潯州爲黔鬱二江之界。其滇南勝境之南所

度火燒鋪南山者其峽中尙有明月水出焉。界從其口東度

兩分而已。老春從此分爲兩支。正支東由亦字孔南東北達樂民

所北而轉安籠所下泗城州旁一支南下東轉而黔滇之界

因之南抵此峒。又南至於江底。又南盡於南盤之北焉。是黔

界越老春之西南不以老春爲界而以南支爲界也。若以老

民所狗場營黃草壩俱當屬滇。以老春查則樂

東行而黔隘小故哀滇益黔以補不足。

碧峒北與新興城

遙對。南與柳樹遙對此地。又滇凸而東者。碧峒寨有民哨

有羅羅共居一寨門之內。其西爲民寨。卽余所棲者。其東爲

羅羅寨。自黃草壩至此米價最賤。一升止三四文而已。

初三日子夜寒甚。昧爽起。雨仍霏霏。旣飯出寨門。路當從小

岐南上山。悞西從大石徑行。初有塢西北去。以爲狗場道。隨

石徑西南轉二里。東界石山南去。塢轉而西。隨之二里。峽中

禾遂盈隴。望北山崖畔。有四五家懸坡上。相去尙一里。而塢

南遂絕。乃狹蒼橫陟其塢。而西北一里。抵北山。郁蘆有兩人

耕於其下。亟趨而問之。尙隔一小溪。其人輒牽牛避去。余爲

停趾。遂告以問道意。其人始指曰。往黃泥河。應從來處。此悞

遊記 五册下 滇三

二

矣。再問以俱在何處。其人不告去。乃返。行泥濘間。路倏斷。條續二里餘。至前轉塢處。猶疑以爲當從南峽入。方惆悵。無路忽見塢邊一牧馬者。呼之。卽碧峒。居停主人也。問何以至此。蓋黃泥河之道。卽從碧峒後。東南逾嶺。乃轉西峽。正與此峽東界石山。南北相隔。但茅塞無路。故必由碧峒始得通行。遂復二里餘。返至碧峒西南。傍其寨門。東南逾嶺而下一里。東南徑塢。半里復上。又半里。又東南逾一嶺。有峽。自南西墜。而路則直西出。坳半里始下。又半里。抵西峽中。遂由峽西行。屢陟岡窪。三里有石峰。踞峽之中。爲當關之標。由其北逾脊而下。時密雲釀雨。見細箐繁崖。深杳叵測。真豹虎之窟也。惴惴

遊記

五冊下

滇三

三

西下一里。度壑。又二里。忽有水自北峽出。下嵌壑中。遶東南而注。是爲黃泥河。其河僅比瀘江水。不濶而深。不渾而急。其源發於樂民所明月所經狗場。至此。東南與蛇場河同。下江底而入盤江者也。時有小舟。熾西稍待之。得渡。遂西上坡。一里半。逾嶺。坳有岐。自東南峽底來。爲入小寨。而抵板橋者。乃知板橋亦四達之區也。又西出峽。見羣峰中圍一壑。而北峰獨稍開。卽黃泥河所環。其一里餘。抵聚落中。是日爲市。時已散。將盡。入肆。覓飯。至人婦。以地澗天雨。勸留。莫前問馬場。尙四十里。度不能前。遂停杖焉。黃泥河聚廬頗盛。但皆草房。其地四面環山。而北卽河繞其後。復東南帶之。西又一小溪。

自西南峽來北注黃泥其中多盤塢環流土膏豐沃爲一方之冠亦佐之米俱自此馬駝肩負而去前擬移縣於此至今稱爲新縣而名亦佐爲舊縣云

初四日晨起雨止四山雲氣勃勃飯而行西半里度一木橋其下溪流自南而北卽西小溪也又西上坡轉而南湖流半里入西峽又半里轉而北其處又有北峽西峽二流之交焉於是隨北峽溪又溯流半里乃西上山時東峰雲氣稍開乃賈勇上躋仰見西嶺最高其上皆夾坡削箐雲氣罩其頂不能悉上躋二里漸入濃霧中遂從峰頭穿峽上於是箐深靈黑咫尺俱不可見又一里陟其頂平行嶺上又二里乃下

遊記 五册下

滇三

四

一里及西塢涉塢而西一里度一小橋橋下水北流乃南向西轉一里有岐交其南北南乃入牛塢邨道有小峰駢立邨隱其下焉北乃其處趨狗場營者又西半里乃西上山其坡峻且滑無石級可循有泥坎陷足升躋極難二里陟峯頭又平行峰頭一里越其巔時濃霧成雨深茅交道四顧皆瀰淪如銀海得峰頭一樹如擎蓋下有列石如錯屏乃就樹踞石而憩止聞颼颼滴瀝之聲而日晡甚如也又西北平行者一里下眺嶺西深墜而下而杳不可見嶺東屏時而上而出沒無常已從北下始有石磴陡墜箐木叢水共一里半陟塢而西亦中窪之宕也半里又逾西坳出其壑大開路乃稍平尖

峰旁立若爲讓道者西向平行塢中一里半有水橫滿於前以爲溪也涉之不流乃壑底中窪之坑畜而成溪者又西二里復有一溪北流甚急波漲水深涉之沒股焉又西一里乃飯於峽坡之下旣飯遂西入竹峽崇峰迴合紆夾高下深窺密箐蒙蒙不容旁入概中通一路石徑逶迤如披重雲而穿密幄也其竹大可爲管瀾漫山谷杳不可窮從來所入竹徑無此深密者

其處名竹園箐自黃泥河西抵馬場人人拥其負家家獻客皆此物也客但出蓋論之耳

中坡陀屢更三里逾峽南下其壑中開又爲霧障止聞隔坡人語聲然不辨其山形谷勢矣南行壑中一里轉而西半里又越一均又半里經峽而西抵危坡下復西向躋登上於是

遊記 五册下
滇三

五

密箐仍縈夾壁懸崖間其陡削雖殊而深杳一如前也攀陟三里西逾嶺頭竹箐旣盡循山南轉皆從嶺上行路東則屏峙而上路西則深墜而下然皆沉霧所翳不能窮晰也南向平陟嶺上者三里轉而西行嶺脊者一里其脊南北俱深墜而下第霧漫莫悉端倪旣而徬北嶺行北屏峙而南深墜又二里雨復大至適得羊場堡四五家當嶺頭遂入宿焉其家竹牀竹戶煨榦餉筍竟忘風雨之苦也

初五日夜雨達旦不休飯而行遂南向稍下已漸轉西兩旁多中窪下陷之穴或深墜無底或瀦水成塘或枯底叢箐不一而足然路猶時時陟岡逾嶺下少上多也十里見路北有

深箐有岐從箐中升合併西去有聚落當嶺頭是曰水槽其處聚落頗盛夾道成衢乃狗場營安籠所桃花大道所出但岡頭無田其上皆耕厓鋤隴祇堪種粟想稻畦在深坑中霧鬢不見也升陟嶺頭又四五里是曰水井其聚落與水槽同由其西一里半始歷磴下遙望西塢甚深下箐中一里由峽底西行二里復逾坡而上一里稍下坡西塢中其中不深而迴峰四闢霧條開合日色山光遠近迭換亦山中幻景也既復西向逾嶺三里見嶺西窪中有水成塘乃循峰西北行稍下一里而入亦佐縣東門縣城磚甃而城外草舍三四家城中亦皆草舍求瓦房寥寥也一里炊於縣前飯後半里出西

遊記

五册下
滇三

六

門乃西北行計其地猶在羣峰之頂但四山霧塞上下莫辨耳從嶺頭西北行二里乃西向歷峻級而下其時霧影亦開遂見西塢中懸東界所下之山與西界崇峰益夾南北中關深壑而揚澤河自北而南經其中焉其形勢雖見而河流猶深嵌不可窺西山崇列如屏南額尤高雲氣尙平抹其頂不令盡露西山之南復起一山斜障而東此則障揚澤而東南合蛇場者也於是盤折西下三里抵坡而磴盡復西北行坡陀間一里逾岡再下數家茅舍在焉然猶未瀕河流也又西半里涉一東來小水乃抵河岸湖之北又涉一東北來小水約半里有渡舟當崩崖下渡之是河發源於平彝衛及白水

鋪以東滇南勝境以西皆注焉其勢半於江底而兩倍於黃泥河急流傾洞南奔東轉與蛇場合而東南會黃泥河水而爲江底河者也亦佐羅平南北東西二處俱以此爲界西登崖崖岸崩頽攀躋而上遂西向陽嶺時暮色將至始以爲旣渡卽有托宿處而荒崖峻坂絕無一人登陟不已暮雨復來五里遇一人趨渡甚急執而問之曰此無托宿處難場雖蓋亟趨猶可及也乃冒雨竭蹶轉向西南上五里逾坳而西乃西轉北行峽中稍降二里得數家之聚焉亟投煨燖暮色已合而雨復徹夜

初六日晨起雨止四山猶氤氳不出旣飯稍西下渡窪復西

遊記

五册下
真三

七

北上漸露昨所望屏列崇峰在西南而路盤其東北三里逾一岡坪間有墟地一方則雞場是也從坳北稍下又得數家之聚焉間之亦雞場也蓋昨所宿者爲雞場東邨此則雞場西邨矣從邨北行其峽西墜處有石峰屹立路從其北逾脊稍東轉而北涉塢其三里遂西北躋窟盤折石磴西北上二里而涉其巔則夙霧頓開日影煥發東瞻群峰吐穎衆壑盤空皆昨所從冥漠中度之者越嶺西下一里抵盤壑中見秋花懸隙細流縈磴遂成一幽異之境西一里有山橫披壑西透其西北腋似有耕雲樵石之棲在西峰後循其東南塢則大路所從去也乃隨塢南轉塢東西山分兩界余以爲塢中

水將南流而不意亦俱中窪之穴也南行三里復逾脊而上遂西轉盤橫坡之南脊焉一里循橫坡南崖而西其處山脊奏合開峽縱橫而森石尤多媚麗又西一里有歧自東南峽來合又西一里乃轉北下於是西向山遙豁而路則循山西北向行矣四里復北向逾岡轉而西下望西北塢中有石壁下嵌不辨其底已而降行塢中一里餘又直造其下則亦中窪之峽也由其南又西行兩陟岡塢共三里始涉一南流小水自渡拐澤河至此俱行嶺上未見勺水又西逾一岡一里南望岡南一峰西

闕洞門高懸門有木橫列而下隔一峽遙睇無路遂不及迂入又半里又涉一南流小水西逾一岡共二里而抵桃源邨

遊記 五册下 滇三

其邨百家之聚與水槽相似倚北山而居前有深塢羅平之道自塢中東南來北東西三面俱會其水南墜入崖洞而南洩於蛇場江故知拐澤西岸崇山猶非南行大脊也邨多木皮覆屋以代茅時日已午就邨舍淪湯餐飯而木濕難燃久之乃西向行渡西北峽石中小水一里陟西塢而上又一里逾岡而西見西塢自西而東其南有小山蜿蜒亦自西而東界之其山時露石骨崢嶸然猶未見豁流也塢中雖旋窪成塘或滙澄流或豬濁水皆似止而不行者又西一里逾岡西下有邨當塢倚南崖而居於是繞邨西行始見塢中溪形曲折且聞溪聲潺湲矣由其北溯之西行又一里見塢中又有

一邨當塢而居始見溪水自西來從其邨西環其邨北又達其東其邨中懸其北曲中一溪而三面環之南倚南山之崖北置木橋以渡溪水其水不甚大而清澈不汨是爲清水溝云蓋發源於西山之廻坎坡經此而東出於桃源始南去者也又西一里復過一邨其邨始在塢北又西一里又經一邨曰小板邨有稅司在焉蓋羅平北境爲桃花駝鹽之間道也又西二里始逾坡涉澗屢有小水自北峽來南注於清水溝路截而逾之也北峽中男婦二十餘人各捆負竹筍而出蓋土人羣入箐採歸淡熏爲乾以待鬻人者又西二里直逼西山之麓有邨倚之是爲廻窰坡清水溝中民居峽塢至此而

遊記 五册下
真三

九

止以塢中有水可耕也由此西南半里過一小橋其水自西北沿山而來卽清水溝上流之源矣度之卽西上嶺嶺頭有索哨者不之與而過躡嶺一里半西陟嶺脊是脊始爲分水之處乃北自白水鋪西直南度此廻環西南而峙爲大壩以分十八寨永安哨江底河諸派者也而羅平之界亦至是而止焉逾脊西漸西北平下一里漸轉而西行塢中其塢東西直亘而南北兩界遙夾之南山卑伏而北山高聳暮霧復勃勃籠北峰上流泉亦屢屢自北注南第南山之麓似有墜澗橫其北然不辨其爲東爲西以意度之以爲必西流矣然不可見也塢中皆荒茅斷隴寂無人煙西行六里其西有山橫

列塢口塢始墜而西下茅舍兩三家依塢而樓路乃逾塢循北山而西半里有茅亭一龕當路有南與茅舍對想亦哨守之處也又西一里稍下有小水成溪自北峽來小石梁跨之其水南注塢口而去旣度梁卽隨西山南向隨流半里轉而西上嶺暮色合矣又上一里而馬塢之聚當嶺頭所投宿者乃新至之家百無一具時日已暮不暇他徙煨濕薪臥濕草暗中就枕而已

初七日晨起雲尙氤氳飯而行有索哨者還宿處解囊示批而去於是西北隨坡平下其路甚坦而種麻滿坡南蓋其下亦有塢西通者西馳四里始與溪近隨流稍南半里復循坡

遊記 五册下
滇三

十

西轉又一里下坡西望西南塢中有數家之聚田禾四達此溪經塢環之其塢自北山隨坡南下中有一水亦自北而南與此水同會於邨北谷而西南破峽去乃西截北來塢半里抵北來之溪有新建石梁跨之是爲獨木橋想昔乃獨木今雖石而猶仍舊名也橋下溪流三倍於西來之水固知北塢之源遠於東矣逾橋西卽上嶺西南直躋甚峻一里半逾其脊又西向平下者一里有岐隨岡南去者陸涼道也岡西塢中復有數家焉亦陸涼屬也其塢亦自北而南雖有邨而無流路西下截塢半里經邨北又半里抵西界崇山下遂躡峻而上而陸涼之界又西盡於此矣蓋因其水南下陸涼故西

自此塢東抵迴窞西山皆屬之陸涼其處南抵陸涼衛路經
尖山天生橋相距尙八十里也由西嶺而上又爲海崖巖乃
亦佐縣右縣丞土司龍姓者所轄亦佐縣有左右二丞皆土
司左丞姓沙在本縣卽與
步雄攻黃草壩者右丞姓龍或
日卽姓海在此而居近越州其地東自此嶺而西抵箐口

焉東與亦佐西界中隔羅平陸涼二州之地間錯其間不接
壤也從東麓西上屢峻屢平峻者削崖盤磴平者曲折透迤
三峻而三逾嶺頭其七里望見南坪有數十家之聚北峰則
危聳獨懸蓋自馬場而西卽望見遙峰尖削特出衆峰之上
而不意直逼其下也又一里梯石懸磴西北抵危峰前其時
麗日轉耀碧天如洗衆峰盡出而是山最高不特獨木西峰

遊記 五册下
滇三

十一

下伏如砥卽遠而迴窞老脊亦不能上與之抗惟拐澤鷄場
西嶺遙相頡頏其中翡翠層層皆南環西轉而接於西南巨
峰此東顧之極觀也其西則亂峰迴窞叢箐盤錯遠雖莫抗
而近多自障焉其南則支條直走近界旣豁遠巘前環此獨
木諸所遙帶而下洩者西南有二峰遙奏如眉中分此盤江
之所由南注者耶其西卽越州所倚而東峰之外復有一峰
高懸其南浮青上蒼圓若團蓋此卽大龜山之特峙於陸涼
路南師宗彌勒四州之交者耶天南諸峰悉其支庶而此峰
又其伯仲行矣由峰西逾脊稍下卽有石坡斜懸平皮砥峙
古木婆娑其上亦高崖所僅見者由此歷級西下一里有壑

迴環中窪四合復有中懸之臺平瞰其中夾坑之岡橫亘其
外石痕木蔭映彩流霞令人神骨俱醒由橫岡西南轉二里
復逾一脊又西度一中懸之岡有索哨者不顧而去度岡而
西一里復上坡又一里西逾其隘復有索哨者亦不顧而去
想皆所云海崖土司者逾脊又不能西見盤江又西半里西
障始盡下界遙開瞥然見盤江之流自西北注東南而去來
猶不能盡矚焉於是西向拾級直下一里抵塢中又西半里
循西山南轉半里復稍上逾岡西復平行嶺上半里有岐一
直西下坑二西南盤嶺見西南路稍大從之二里得數家當
嶺頭其茅舍低隘半畜襍處其中皆所爲羅羅也男子皆出

遊記

五册下

滇三

十二

婦人莽不解語索炊具無有應者是卽所謂箐口也海崖之
界於是止焉由岡頭西南去爲越州道從此西北下卽越州
屬爲曲靖道遂西北下嶺始甚峻一里轉西漸夷於是皆車
道平拓無齟齬之慮矣又西一里飯於樹下又西馳七里始
有塢北來遂盤東山北轉一里始橫截北來之塢余始意塢
中當有流南注而不知其塢亦中窪也塢中橫亘一岡南北
俱成盤壑而壑南復有岡焉從中亘者馳而西一里復西上
坡又一里陟坡之脊亦有獠獞數家問之道不能對也從脊
西下三里連越兩坡又見塢自北來南向去其中皆員窪貯
水有岡中間不通流焉從坡上西北望則龍潭之山自北分

突屏列而西此近山也西南望則越州南嶺隔山遙障所謂西峰也而東峰之外浮青直對則大龜之峰正與此南北相準焉西下坡又有一塢自北而南南環爲大塢與東界連窪之塢合此塢始有細流中貫夾塢成畦流上橫小橋西度有老人持筐賣梨其側一錢得三枚其大如甌味鬆脆而核甚小乃種之絕勝者聞此中有木瓜梨豈卽此耶西上一岡平行岡上四里直抵西峰下則有塢隨其麓而深澗潔之所謂龍塘河也然但見澗形而不能見水乃西下坡約半里隨塢出西南先與一小水遇隨之旣乃截塢而西又半里始與龍塘河遇有大石梁跨其上橋右邨廬纍纍倚西山而居始

皆瓦房非復茅舍矣龍塘河之水發源於東北山峽中其處環潭甚深爲蛟龍之窟卽所謂曲靖東山之東峽也其山北自白水鋪西分水嶺分支南下直曲靖之東故曰東山而由此視之則爲西嶺焉南至此瀕河而止其西腋之中爲閩木山東腋之中爲龍潭卽此水之所出矣自箐口西下塢中卽爲越州屬州境至此西止而田疇悉環聚焉由邨西上坡卽東山之南盡處也二里逾岡頭方踞石少憩忽一人自西嶺馳來謂余曰可亟還下山宿前嶺方有盜劫人毋往也已而其婦後至所語亦然而仰視日方下午前終日馳無人之境皆豺狼魍魎之窟卽深夜幸免豈此周行東西夾山而居者

甚衆反有賊當道取因詰之曰既有賊汝何得至其人曰彼方剝行者衣余夫婦得迂道來耳余疑此人欲誑余還宿故托爲此言又思果有之今日日返宿將明日又孰保其不至耶况旣劫人彼必無復待之理不若卽馳而去也遂叱顧僕行卽從岡上盤北山而西蓋北卽東山南下之頂南卽其山下墜之峽而盤江自橋頭南下爲越州後橫亘山所勒轉而東流遂截此山南麓而斷之故下皆祖礧路橫駕嶺上四里抵其中旁矚北嶺石叅差而岫岈巉覺雲影風枝無非惴人之具令人錯顧不定投趾莫擇又西四里始西南下片石中其處土傾峽墜崩嵌交錯而石骨露其中如裂瓣綴行其墜

遊記

五冊下
滇三

十四

處皆流土不可着足必從石瓣中宛轉取道其石質幻而色異片片皆英山絕品惟是風鶴驚心不能狎憩而徐賞之亡何已下見西塢南流之江知去橋頭不遠可免虎口乃倚石隙少憩竟作青蓮瓣中人矣從石中下者一里旣及西麓復行支隴遂多聚廬之居又一里路北江廻堰曲中涵大塘一圍四面豐禾環之東有精廬高倚東山之麓西則江流所洩而石梁橫跨之又行畦間半里始及石梁其梁不高而長是爲南盤之源北自炎方交水曲靖之東直南至此是橋爲曲靖鎖鑰江出此卽東南流遶越州之東而南入峽焉逾梁而西約半里上坡北而宿于逆旅卽昔之所過石堡邨也適夜

色已曠。明月在地。過畏途。就安廬。樂甚。問主人。嶺上有禦人者。果有之乎。主人曰。卽余隣人。下午樵於山。數賊自山後躍出。剝三人衣而碎一人首。與君來時相後先也。予於是始感前止宿者之情。而自媿以私衷臆度之也。蓋是嶺東爲越州。西爲石堡。乃曲靖衛屯軍之界。互相推諉。盜遂得而乘之耳。初八日。昧爽。飯索酒而酌。爲浴泉計。遂由邨後越坡。西下。則溫泉在望矣。塢中蒸氣氤氳。隨流東下。田畦間鬱然四起也。半里。入圍垣之戶。則一泓中貯。有亭覆其上。兩旁復磚甃。兩池夾之。北有榭。三楹。水從其下來。中間一孔。方徑尺。可掬而盥也。遂解衣就中池浴。初下。其熱爍膚。較之前浴時覺甚烈。

遊記 五册下
滇三

十五

旣而溫調適體。殊勝彌勒之太涼。而清冽亦過之。浴罷。由垣後。東向半里。出大道。是日碧天如濯。明旭晶然。騰翠微而出。浩波映其下。對之覺塵襟盪滌。如在水壺玉鑑中。北行十里。過南城。又二十里。入曲靖南門。時有戈叅遊者。奉按君命。巡諸城堡。高幢大纛。擁騎如雲。南馳而去。余避道。旁眎之。如赫電。亦如浮雲。不知兩界青山。見慣袒當誰左也。飯於麴肆中。出東門半里。入東山寺。是名青龍山。而實無山。郭東崕嶮。高僅丈餘。大不及五丈。上建大殿。前列層樓。配之置宏鐘焉。鐘之大。余所未見也。殿左有藏經閣。其右樓三層。皆翼於崕嶮之旁。而齊其末者。徙倚久之。出寺右。循城而北。五里。出演武

場大道又三里過白石江又二里過一坡又十里抵新橋殷雷轟然大雨忽至避茅簷下水霰交作迴風湧之撲人衣面莫可掩蔽久之乃霽仍北行溼滑不可着趾十里抵交水入南門由霑益州署前抵東門投舊邸龔起潛家見其門閨異之叩而知方演劇於內也余以足泥衣垢不樂觀亟入其後樓而憩焉

霑益惟土司居州治而知州之署則在交水

初九日余倦於行役憩其樓不出作數日遊紀是日爲重九高風鼓寒以登高之候而獨作袁安僵臥之態以日日躋攀崇峻不少也下午主人攜菊具酌不覺陶然而臥

初十日寒甚終日陰翳止寓中下午復雨徹夜不休

遊記 五册下
滇三

十六

十一日余欲行主人以雨留復爲強駐厭其酒脯焉初余欲從霑益并窮北盤源委至交水龔起潛爲余談之甚晰皆鑿鑿可據遂圖返轅由尋甸趨省城焉

十二日主人情篤候飯而行已上午矣十里仍抵新橋遂由岐湖流西南行二里抵西南小山下石幢之水乃從西北峽中來路乃從西南峽中入一里登嶺一里陟其巔西行嶺上者又一里乃下初從嶺頭下瞰西塢有廬有疇有水滌之以爲必自西而東注石幢者迺遲西下者又一里抵塢中則其水返西南流當由南谷中轉東而出於白石江者詢是邨爲戈家冲由是而西併翠峰諸澗之流皆爲白石江上流之源

矣源短流微際帶不過數里之內而沐西平曲靖之捷誇爲
冒霧涉江自上流渡而夾攻之著之青史爲不世勳而不知
與坳堂無異也徵事考實書之不足盡信如此於是盤折坂
谷四里越劉家坡則翠峰山在望矣蓋此山卽兩旁中界之
脊南自宜良分支北度木容箐又北而度火燒箐嶺又北度
響水西嶺又北而結爲此山又西夾峙爲廻龍山繞交水之
西北經炎方又北抵雷益州南轉東復折而南下峙爲黑山
分爲兩支正支由火燒鋪明月所之間南走東折下安籠所
入泗城州而東峙爲大明山遂盡於潯州旁支西南由白水
西分水嶺又分兩支直南者由廻窰坡西嶺西南峙爲大龜

遊記

五册下
滇三

十七

山而盡於盤江南曲西南分支者盡於曲靖東山其東南之
水下爲白石江東北之水下爲石幢河而西則洩於馬龍之
口江而出尋甸爲北盤江焉然則一山而東出爲南盤西出
爲北盤惟此山及炎方足以當之若曲靖東山則旁支錯出
而志之所稱悉悞也由劉家坡西南從坡上行一里追及一
媪乃翠微山下橫山屯人也隨之又西一里乃下坡徑塢一
里有小水自西北小石梁跨之從此西南上坡爲三車道從
此直西溯小水自西南岸入爲翠峰間道其路若續若斷橫
截塢隴三里有大道自東南來則自曲靖登山之徑也於是
東南望見三車市矣遂從大道西行二里將抵翠峰下復從

小徑西南度隴風雨忽至頃刻而過一里下坡涉深澗又西
上坡半里抵橫山屯其屯皆徐姓老嫗命其子從邨後送余
入山半里抵其麓卽有兩小澗合流涉其北來者溯其西來
者遂躡峻西上一里半盤嶺頭而北轉入西峽中則山之半
矣其山自絕頂垂兩支如環臂東下北支長則繚繞而前爲
新橋西岡之脉南支短卽所躡以上者兩臂之內又中懸一
支當塢若臺之時則朝陽菴踞其上菴東北向其南腋又與
南臂環阿成峽自峰頂逼削而下則護國舊寺倚其間自西
峽入半里先達舊寺然後東轉上朝陽以舊寺前墜峽下墜
也舊寺兩崖壁夾而陰森其病在窈無餘地朝陽孤臺中綴

遊記 五册上
滇三

十八

而軒朗所短在前少迴環余先入舊寺見正殿亦整其後遂
危崖迥峭藤木倒垂於其上而殿前兩柏甚巨夾立參天寺
中止一僧乃寄錫殿中者一見卽爲余蒸火炊飯余乃更衣
叩佛卽乘間東登朝陽一頭陀方曳杖出菴門余入其菴亦
別無一僧正有讀書者數人在東樓余間步前庭庭中有西
番菊兩株其花大如盤簇瓣無心赤光燦爛黃菊爲之奪艷
乃子種而非苗也此其異於諸菊者前樓亦幽迥庭前有桂
花一樹幽香飄泛遠襲山谷余前隔峽盤嶺卽墮而異之以
爲天香遙墜而不意乃敷萼所成也桂芬菊艷念此幽境恨
無一僧可托還飯舊寺卽欲登頂爲行計見炊飯僧慇懃整

餉雖瓶無餘粟，豆無餘蔬，殊有割指啖客之意，心異之。及飯則已箸不沾蔬而止，以蔬奉客，始知卽爲淡齋師也。先是橫山屯老嫗爲余言，山中有一僧，損口苦體，以供大衆，有子衣者，輒復予入，有餉食者，已不鹽不油，惟恐衆口弗適。余初至此，訊之，師不對。余肉眼不知卽師也。師號大乘，年甫四十，初爲川人，長於姚安，寄錫於此，已暮年矣。發願淡齋，供衆欲於此靜修三年，百日始一下山，其形短小，而目有瘋癘之疾，苦行勤修，世所未有。余見之，方不忍去，而飯未畢，大雨如注，其勢不已。師留止宿，余遂停憩焉。是夜寒甚，余宿前楹，師獨留正殿，無具，無龕，徹夜禪那不休。

遊記 五册下
滇三

十九

十三日，達旦雨不止。大乘師復留憩，余見其瓶粟將盡，爲炊粥爲晨餐。師復卽另爨爲飯。上午雨止，恐余行復強，余餐忽有一頭陀入視，卽昨朝陽入菴時曳杖而出者。見余曰：君尙在此，何不過我，我猶可爲君一日供，不必噉此也。遂挾余過朝陽，其煨火具餐，師號總持馬龍人，爲曲靖東山寺住持。避囂於此，亦非此菴主僧也。此菴主僧曰瑞空，昨與舊寺主僧俱入郡，瑞空歸而舊寺僧并不知返，蓋皆蠢蠢世法佛法，一無少解者。大乘精進而無餘貲，總持靜修而能撙節，亦空山中兩勝侶也。已而自言其先世爲姑蘇吳縣籍，與余同姓。昔年朝海過吳門，山塘徐氏欲留之放生池，師不果而歸。今年

已六十三矣是夜宿其西樓寒更甚而夜雨復潺湲

十四日雨竟日不霽峭寒砭骨惟閉戶向火不能移一步也

翠峰山在曲靖西北交水西南各三十里在馬龍西四十

里秀拔爲此中之冠朝陽菴則劉九菴大師所開建者碑言

師名明元本河南太康人曾中甲科爲待御嘉靖甲子駐錫

翠峰萬歷庚子有征播之役軍門陳用賓過此感師德行爲

土人言劉

建此菴後師入涅槃陳軍門命以儒禮葬於菴之東原侍御出巡案置二桃爲鼠所竊劉窺見之佯試門子曰汝何竊桃門子不承嚇之曰此處豈復有他人而汝不承吾將刑之門子懼刑遂妄承之問核何在門子復取他核以自誣劉曰天下事枉者多矣乃棄官薙髮于此曲靖者

本唐之曲州靖州也合其地置府而名亦因之雷益州土

遊記 五册下

滇三

二十

知州安邊者舊土官安遠之弟兄終而弟及者也與四川烏

撒府土官安孝良接壤而復同宗水西安邦彥之叛孝良與

之同逆未幾死其長子安奇爵襲烏撒之職次子安奇祿則

土舍也軍門謝命雷益安邊往諭水西邦彥拘留之當事者

卽命奇祿代署州事并以上聞後水西出安邊奉旨仍掌雷

益奇祿不得已還其位而奇祿有烏撒之援安邊勢孤莫助

擁虛名而已然邊實忠順而奇祿狡猾能結當道歡今年三

月何天衢命把總羅彩以兵助守雷益彩竟乘幾殺邊并挈

其貲二千金去或曰彩受當道意指皆爲奇祿地也奇祿遂

復專州事當道俱翕然從之獨總府沐日邊雖土司亦世臣

也。况受特命豈可殺之而不問。故至今九月間。霜益復。机枰不安。爲未定之局云。下午飯後。伺雨稍息。遂從朝陽右登頂。西上半里。右瞰峽中。護國寺下嵌窅。口左瞻岡上八角菴。上踞朝陽後脇。西眺絕頂之下。護國後箐之上。又有一菴。前臨危箐。後倚峭峰。有護國之幽。而無其逼。有朝陽之壇。而無其孤。爲此中正地。是爲金龍菴。時霏雨復來。俱當歧而過。先上絕頂。又西半里。逾北嶺。望見後數里外。復一峰高峙。上亦有菴。曰盤龍菴。與翠峰東西駢峙。夾北塢而下。卽新橋石幢河之源也。於是南向攀嶺脊。而登過一虛堂。額曰恍入九天。又南上。其半里。而入翠和宮。則此山之絕頂也。翠峰爲曲靖。

遊記 五册下

滇三

二十一

名峰而不著於統志。如闔木之在東山。與此隔海子遙對。然東山雖大而非正脈。而此峰則爲兩江鼻祖。余初見西塢與迴龍夾北之水。猶東下新橋。而朝陽護國。及是峰東麓之水。又俱注白石。疑是峰猶非正脊。及登頂而後。知正南下墜之峽。則南由響水岫。西獨西下。馬龍出尋甸矣。始信是頂爲三。面水分之界。東北二面俱入南盤南面入北盤其脈南自響水岫。西平度而時爲此峰。卽西度盤龍。其水遂南北異流。南者從西轉北。北者從東轉南。兩盤之交錯。其源實分於此云。翠和頂高風

峭。兩老僧閉門煨火。四顧霧縠。峰瀾畧瞰大畧。由南塢西下。爲尋甸問道。余擬明日從之。而去者遂東南下。由靈官廟東。

轉半里入金龍菴菴頗整潔庭中菊數十本披霜含雨幽景
凄絕是菴爲山東老僧天則所建今天則入省主地藏寺而
其徒允哲主之肅容具齋暝雨漸合遂復半里東還朝陽欲
下護國看大乘師雨滑不能蹶之而過

十五日達旦雨止而雲氣驟變余復止不行日當午獻影余
遂乘輿往看大乘大乘復固留時天色忽霽余欲行而度不
及姑期之晚過爲明日蚤行計乃復上頂環眺四圍遠峰俱
出始晰是山之脉但東西橫列而脉從中度屢伏屢起非直
亘之脊也惟翠峰與盤龍二峰乃東西並夾而翠峰之南響
水岫之支橫列東下而結爲曲靖盤龍之西又南曲一支始

遊記 五冊下
滇三

三十一

東下而結爲交水又橫亘而北始東滙炎方之水又北始轉
度霑益之南塢焉從峰東下又還過八角菴仍返餐於朝陽
爲總持所留不得入護國是日以麗江嵩明二處求兆於翠
和靈籤麗江得貴人接引喜更新
嵩明得枯木逢春欲放花皆吉兆也午晴後纔計明
日可早行旣暮而雨復合

十六日阻雨

十七日雨復達旦念自駐朝陽者數日飯後欲別而行總持
謂雨且復至已而果然已復中霽旣乃大注傾盆倒峽更甚
於昨

十八日徹夜徹旦點不少輟前二日俱午刻朗然而此卽閃

燦之影一併無之。而寒且更甚。惟就楫桡作生涯。不復問前程矣。

十九日。晦雨仍如昨。復阻不行。檣梭閒談。總持昔以周郡尊

事逮繫。枿楊甚苦。因筆記之。東山寺昔有藏經。乃唐巡撫所請歸者。邵守周之相石阡人。由

鄉薦。擢守曲靖。以清直聞。慕總持師道。行請之。檢藏延侯甚密。逆東巡守。以下諸僚皆有濁清之恨。而周復不免揚其波。

子是悉側目之中。傷于撫臺王。仇羅織無跡。遂誣師往還爲交。通賄賂。以經麓爲筐篋。坐以重贓。周復代爲完之。而去云。

二十日。夜不聞簷溜。以爲可行矣。晨起而霧復以爲霽。可待

也。旣飯而霧復成。雨及午。過大霧。以爲此霧必有久晴。追暮

而雨聲復瑟瑟。達夜而更甚焉。

二十一日。晦冥終日。迨夜復雨。是日下午。散步朝陽東。數十

遊記 五册下
滇三

二十三

步東峽中一菴。當峽。是曰太平菴。蓋與護國東西夾朝陽者。

太平老僧煮芋煨粟以餉。

二十二日。晨起晦冥。然決去之念已不可止矣。上午乃行。總

持復贈之以米。恐中途雨後。一時無宿者耳。旣別。仍上護國

後夾箐中。觀龍潭。潭小而流不竭。蓋金龍菴下夾壁縫中之

液。雖不竭而非涵瀦之窟也。遂西上逾嶺。循翠和宮之後。一

里餘。又逾嶺而南下。雨猶霏霏不已。半里。及塢中。又一里有

岐北轉。悞從之。漸入山夾。則盤龍所登之道也。仍出從大道

西南行。二里有邨當塢中。溪流自塢直南去。路由邨西轉北

行半里。涉塢而西。一里。又有邨在坡間。是曰高坡邨。由邨後

下岡有岐從塢中西南去爲小徑可南達鷄頭邨從岡上西北轉爲大徑乃駝馬所行者初交水主人謂余有問道自尋甸出交水甚近但其徑多錯乃近日東川駝銅之騎所出無同行之旅不可獨去須從響水走鷄頭邨大道乃余不趨響水而登翠峰問道於山僧俱云山後雖卽駝銅道然路錯難行須仍出鷄頭爲便至是余質之途人亦多主其說然見所云徑路反大而所云往鷄頭大路者反小甚心惑之曰以邨人爲卜然已過邨見有邨人自山中負薪來呼而問之則指從北不從南余乃從駝馬路轉西北循岡三里西北過一脊其脊乃自盤龍南度者余初以爲分支南下而不意乃正脉

遊記 五冊下
滇三

二十四

之曲出岫西見脊東所上者甚平而脊西則下墜深曲脊南北又從嶺頭駢峰高聳各極嗟哦意是山之脊又直折而南蓋前自翠峰度其北去者此又度其南一脊而半日間兩度之矣從岫西隨南峰之上盤腰曲屈其坑皆深墜北向一里躋一坡二里又北度一脊其脊平亘於南北之中者於是又一里再躋北嶺始西北下其時天已漸霽無復晦冥之色遠峰近峽環矚在望二里下西塢其塢自南而北其中黃雲盤隴邨落連錯一溪中貫之問水所從出則仍從新橋石幢河也問其所從來則堰口也問其地何名則兔街子也始信所過之脊果又曲而南過堰口當又曲而北余前登翠峰第見其西過盤

龍不至此。又安知其南由堰口耶。前之爲指南者，不曰鷄頭，卽曰桃源。余乃湯隨馬跡，再歷龍脊逢原之異，直左之右之矣。下塢南行二里，遂橫涉其溪，中流湯湯猶倍於白石江源也。南上坡一里，是爲堰口，聚落數十家在溪北岡上，乃入炊久之，飯而行，陰雲復合，其處有岐，北入山爲麥冲道，余乃西向行，其溪亦分歧來，一自北峽，一自西峽，余度其北來者遂西入峽，漸上漸峻，天色亦漸霽，四里從嶺上北轉，則北峽之窮壁處，又一里復逾嶺而西，是嶺自木容箐楊金山北走翠峰，復自盤龍南走高坡，又南至此始轉而北，其東西相距數里之內，凡三曲焉。余一日三過之，何遇之勤而委曲不遺耶。

遊記 五册下

滇三

三五

從嶺西涉塢，其水遂南流一里，於是又北轉逾嶺一里，西北下山二里，抵塢中，隨小水北向出峽，始有塢成畦，路當從畦隨流西去，而塢北有邨聚當北岡上，是爲洒家。想亦土酋之姓，或曰亦屬

平

乃一里經塢登岡，由洒家西向行一里，越隴西下，有峽自

北來，小水從之，是亦麥冲南來之道，遂循其塢轉而西南行二里，抵新屯廬舍夾道，豐禾被塢，其處爲平彝之屯，據土人言，自堰口之北鬼街子，屯屬平彝，而根則寄于南寧，自洒家之西抵三車屯，屬平彝，而根則寄于馬龍，自一碗冲之西抵魯石屯，屬平彝，而界則屬于尋甸。蓋尋甸曲靖以堰口老龍南分之脊爲界，馬龍南寧以堰口老龍爲界，而平彝則中錯

于兩府之交而爲屯者也自屯西逾坡共一里餘過一塢有二三家在西嶺其塢復自北而南由邨南轉而逾岡西南下二里復有一塢溪疇南環聚落北倚是爲保官兒庄夾路成衢爲邨聚之最盛者此亦平彝屯官之庄也

二十三日中夜聞隔戶夜起者言明星熒熒鷄鳴起飯仍濃陰也然四山無霧昧爽卽行始由西南涉塢一里漸轉西行入峽平涉而上三里逾一峒脊遂西下兩上兩下兩度南去之塢兩逾南行坡脊而西共五里有邨在西坡上是曰三車由其邨後復逾南行一坡度南行一塢一里半披西峽而入於是峽中水自西而東溯之行半里漸盤崖而上崖南峽中

遊記
五冊下
滇三

二十六

碧木森鬱微霜乍染標黃登紫錯翠鋪丹令人恍然置身丹峽上一里又逾一脊是爲南行分脊之最遠者東西皆其旁錯也由脊西下涉塢再西共二里有峽甚逼隨峽西折而南行半里復西逾嶺半里出嶺西始見嶺北有塢居廬環踞岡上是爲一碗冲於是西行嶺脊之上其嶺頗平南北皆塢而脊橫其中一里陟脊西又南轉逾岡西下共一里度一峽想卽一碗冲西向洩流之峽也又西北上坡其坡頗長一里陟其巔於是東望所度諸嶺如屏層遶而直東一峰浮青遠出恐尙在翠峰之外豈東山閩木之最高處耶北望乃其峰之

分脊處。至是乃見迴支環壑。而南望則東南最豁。此正老春
分支環於板橋諸處者。不知此處何以反伏其脊。其外亦有
浮青特出遠甚。當是路南市邑之間。惟西則本支尙高。不容
外躡也。由巔南循坡西轉。半里。又西度脊。從脊西向西北下
塢。約一里。有溪始西向流。橫二松渡之。其溪從西峽去。路循
西北坡上。一里。復西逾脊。環坡南下。遂循之行。一里。轉而西
下有塢。自北來頗巨。橫涉其西。膝泥污潭。半里。有大聚落在
西坡下。是爲魯石哨。其處已屬尋甸。而屯者猶平彝軍人也。
由邨南西上逾坡。一里。復逾岡頭。轉而西南二里。又西向逾
脊。從脊西下峽中。半里。峽北忽下墜成坑。路從南崖上行。南

遊記 五册下
滇三

二十七

聳危巘。北陷崩坑。坑中有石幢。則崩墮之餘也。循坑西下。又
半里。有北來之塢。橫度之。又半里。涉溪西上。復西南上坡。橫
行坡上。一里。又西向入峽。其南有峰尖聳。北有峰駢立。二里。
從南峰之北逾腋而西。又一里。始行北峰之南。岡與北峰隔
塢相對。有邨居倚北峰而懸塢北。是爲郭擴。始非平彝屯。而
爲尋甸編戶。由其西南下坡。半里。涉小澗。西登坡。循坡北行。
又與駢峰東西隔塢。共二里。北上。瞰駢峰之陰。遂西半里。逾
岡。從岡上平行。有中窪之坑。當岡之南。樹墜而西。其西有尖
峰。純石而中窳。兩腋屬於南北。若當關之標。路行坑上。一里。
出尖石峰之北腋。遂西向而下一里。抵西壘。則尖石峰之西

麓矣於是南界擴然直望一峰最高遠插天表余疑以爲堯
林山而無可徵也迤東諸山惟堯林山最高聳特出在嵩明東二十里與河口隔河相對登楊林老脊猶東望而見之今則南望而見之皆在七八十里之外按志無堯林之名惟有秀嵩山在嵩明州東二十里聳秀插霄漢環州之山惟度壑西轉二里越小溪橋有邨在北隴是曰壁此爲最耳

假由其西攀嶺北上旋逾峒而西一里復下涉壑又南見天
表高峰時已追及一老人執而問之果堯林也又西一里復
入西峽躡峽而上半里逾嶺西西界遙山始大開望見南龍
老脊自西南橫列而東北則東川尋甸倚之爲界者也其脊
平時天際而西南與東北兩頭各起崇峰其勢最雄亦最遠
從屏峙中又分列一支自西北走東南若八字然其交分之

遊記 五册下
滇三

三八

處山勢獨伏而尋甸郡城正托其峒中由伏處入爲東川道
西逾分列之脊爲嵩明并入省道循分列東麓而南爲馬龍
道楊林之水遶堯林之東馬龍水由中和北轉同趨而北皆
隨此分列之山而合於其東者也但溪流猶不可見而郡南
海子則汪然可挹從此西下坡峻嶺豁二里抵其峽中有小
水亦南行隨之西南又半里北塢迴環中有邨廬當坡曰海
桐由其南西度塢復上岡一里抵岡頭隨岡南下轉而西共
二里塢自北來溪流隨之內有邨當塢曰果壁外有石堰截
流路由塢上涉水而西從平坡上行二里稍下有邨倚坡之
西曰柳塘於是坡盡畦連北抵迴峰西逾江而及郡南接海

子皆禾稻之區而邨落相望矣從畦厓西行二里則馬龍之溪自東南峽出楊林之溪自西南峽出夾流而北至此而合石梁七洞橫架其上曰七星橋其自南而北爲北盤上流正與石堡橋之流自北而南爲南盤上流勢正相等但未能及曲江橋之大也過橋有廟三楹東向臨之中有舊碑或言去郡城十五里或言二十里或名爲江外河或名爲三岔河無定里亦無定名而一統志又名其溪爲阿交合溪又注舊名爲些邱溢派江名其橋爲通靖橋然注其橋曰城東二十里跨交合溪注其溪曰府東南十五里合流又自異焉按舊城在今城東五里今城築於嘉靖丁亥安銓亂後則今以十五

逆記 五册下
滇三

二九

里之說爲是乃屢訊土人皆謂其流出東川下馬湖無有知其自霑益下盤江者然一統志曰入霑益後考之府志其注與一統同叅之曩起潛之說確而有據不若土人之臆度也或有謂自車洪江下馬湖其說益訛亦可見此水之必下車洪車洪之必非馬湖矣蓋車洪之去交水不遠起潛之諸霑益甚真若車洪之上不折而西趨馬湖則車洪之下不折而北出三板橋則起潛之指示可知也由江西岸北行半里隨江折而西循江南岸依山陟嶺又二里餘江折而北路逾嶺頭折而南下半里由塢中西行於是循鳳梧南山之麓矣按鳳梧山者在郡城東北十里山脉由郡西外界老營排列東

突爲是山西北一峰圓聳東南一峰斜竄爲郡中主山阿交合溪自東來逼其麓轉而東北入峽去若避此山者是老龍東北行之脊也一統志無其名止標月狐山在城東北八里環亘五十餘里以舊城計之當卽此山第府志則月狐鳳梧並列似分兩山然以山形求之實無兩山分受也豈舊名月狐後訛狐爲梧因訛月爲鳳耶豈員聳者爲月狐而後人又分斜竄者爲鳳梧耶共西三里南望壑中海子水不甚大而零漚連珠蓋郡城之流東南下楊林之川南來相距於壑口而不相下遂滯而成浸者坡南下處石漸稜稜露奇又一里行石片中下忽有清泉一泓自石底溢而南出其底中空泉

遊記 五册下
滇三

三十

混混平吐清冽鑑人着宇又西數步又有泉連瀦成潭乃石隙迴環中下溢而起汎汎不竭亦溢而南去此潭員若鏡而無中空之隙不知水從何出然其清冽不若東泉之碧瑩無纖翳也按郡志八景中有龍泉雙月謂郡城東十里有雙泉相去十餘步月夜中立其間東西各見月影中逗以余觀之泉上石環樹罨雖各涵明月恐不移步而左右望中未必能兼得也又西半里有聚落倚山而壑是爲鳳梧所土人謂之馬石窩想未置所時其舊名然耳於是西北隨田脰行坡隴間時有聚落而不甚盛按郡志舊郡址在今城東五里不知何卹足以當之共西三里有溪流自北塢來中貫田間有石

梁跨之越之西行又三里復有溪自北塢來亦貫田間而石梁跨之此卽所謂北溪也水在郡城之北爲最近乃城西坡與鳳梧夾腋中出者越梁又西行一里入尋甸東門停展於府治東之旅肆尋甸昔爲土府安氏世長之成化間始改流至嘉靖丁亥安之裔孫安銓者作亂構武定鳳延文攻毀楊林馬龍諸州所當道奏發大兵殲之并武定改流乃移尋甸郡於舊治之西五里直逼西山下始築城甃磚爲雄鎮云

按鳳延文或又稱爲鳳繼祖又稱爲阿鳳或又稱爲鳳顯祖自改名鳳延霄或又云木江西人贅武定土官媼遂專恣作亂以兵直逼省後獲而磔之

尋甸四門俱不正蓋因山勢所就也東門

偏于北南門偏於東西門偏於南惟北門差正而又非經行

遊記 五册下
滇三

三十一

之所城中惟街二重前重乃府與所所蒞後重爲文廟城隍察院所倚其向俱東南尋甸之城直東與馬龍對直西與元謀對直南與河口對直北與東川對其西北皆山其東南大麓

二十四日余初欲行偶入府治觀境圖出門左有肆中二儒冠者問圖志以有版可刷對余辭以不能待已而曰有一刷而未釘者在城外家中索錢四百余予之過半旣又曰須候明晨乃得余不得已姑需之聞入景中有北溪寒洞在東門外北山之下北溪水所從出也因獨步往探之遍詢土人莫有識者遂還步城內後街入儒學城隍諸廟下午還寓作記

是日晴而有風。城中市肆與廣西府相似。賣栗者以火炙而賣之。

二十五日晨起往索志其人初謂二本既而以未釘者來止得上册而仍少其半余畧觀之知其不全考所謂阿交合溪之下流所載亦正與一統志同惟新增所謂鳳梧山雙龍潭之類而已乃畀還之索其原價遂飯而行出西門卽上西山峻甚五里逶迤躡其頂則猶非大龍之脊也其脊尚隔一塢西南自果馬山環界而北乃東度而爲月狐從其北度之峒又南走一支橫障於東卽此山也志稱爲隱毒山謂山下有泉爲隱毒泉蓋是山之西與老龍爽而中窪內成海子較南海子頗長而深是山之東有泉二派一出於北今名爲北溪一出

遊記 五册下 瀆三

三十三

於南脫數字而是山實南北俱屬於大脊焉由其西向西南下

二里抵塢中有小坑瀦汚流不甚大也西涉塢一里半草房數間倚南坡上爲黑土坡塢前有歧西北由塢中行爲潘金魏所道西南上坡爲正道余乃陟坡一里復南逾其岡岡頭多芻井中陷草莽翳之或有間水聲潺潺者越岡南行二里餘乃下坡遂與西海子遇其水澄碧深泓直漱東山之麓路旣南臨水滙遂東折而循山麓行南向二里見其水汪汪北轉環所逾芻井之岡南抵南岡東逼山麓而西瀨所聚焉蓋惟西北二面大脊環抱可因泉爲田而三所屯托之所謂潘所金所魏所也乃土官三姓三所在海子西與余所循山麓隔水

相望是水一名清海子一謂之車湖水瀕山麓清徹可愛然
涸時中有淺處可徑而南也今諸山岡支瞰其間湖水紆折
迴抱不啻數十里一統志謂四圍皆山者是謂周廣四里則
不止焉想從其涸時言也又南一里東逾一瞰水之岡又陟
瞰水之坡南向一里海子南盡遂西南逾岡而行岡不甚峻
而橫界於東西兩界之間皆廣坡漫衍由其上南行四里稍
南下忽聞水聲已有細流白岡西峻墜溝而南矣有數家在
西山下曰花箐哨始知其岡自西界老脊度脈而東時爲東
界北走而連屬於鳳梧之西岫是爲隱壽山中環大窪而清
海子瀦焉南走綿聳於河口之北崖是爲堯林山前挾交溪

遊記 五册下
滇三

三十三

而果馬水入焉不陟此岡不知此脈乃由此也於是隨水南
行皆兩界中之坂隴或涉西委之水或逾西垂之坡升降俱
不甚高深而土衍不能受水皆不成畦然東山逶迤而不峻
西山崇列而最雄路稍近東山而水悉溯西山而南焉則花
箐諸流之下洩于果馬溪者又楊林之源矣南行二十五里
始有聚落曰羊街子其西界山至是始開峻重巒兩疊湊列
中有懸箐焉由此而入是爲果渡木朗乃尋甸走武定之間
道蓋西界大山北向一支自西南橫列東北起嶂最高如重
蓋上擁南向一支亦自西南橫列東北排巒稍殺如外幔斜
竇離北高南下而其脈實自南而北登而中懸一箐爲叢薄

爲中通之隙焉。是曰果馬山。而南北之水由此分矣。羊街子居廬頗聚。又有牛街子。在果馬溪西大山下。與羊街子皆夾水之市。皆木密所分屯。於此者。蓋花菁。而南至此始傍水爲隘耳。時方下午。問前途宿所。必狗街子。去此尙三十里。恐行不能及。遂人皆勸止。遂停憩逆旅。草記數則。薄暮。雨意忽動。中夜聞潺潺聲。

二十六日晨起。飯後雨勢不止。北風釀寒。殊甚。待久之。不得已而行。但平坡漫隴。界東西兩界中路。從中而南。雲氣充塞。兩山漫不可見。而寒風從後擁雨而來。傘不能支。寒砭風刺。兩臂僵凍。痛不可忍。十里稍南下。有流自東注於西。始得夾

遊記 五册下
滇三

三十四

路田畦。蓋羊街雖有田畦。以溪傍西山。田與路猶東西各別耳。渡溪南。復上坡二里。有聚落頗盛。在路右。曰間易屯。又北一里半。南岡東自堯林山直界而西。西抵果馬南山下。與果馬夾溪相對。中止留一隙。縱果馬溪南去。溪岸之東山阻。溪不能前。遂北轉。溯流作環臂狀。又有邨落倚所環臂中。東與行路相向。詢之土人。曰果馬邨。從此遂上南岡。平行岡嶺二里。是爲尋甸雲南之界。蓋其嶺雖不甚崇。自南界橫亘直塞西峰。約十餘里。橫若門闕。平若堵牆。北屬尋甸。南屬嵩明。由此脊分焉。稍南路左峰頂。有菴二重。在松影中。時雨急風寒。急趨就之前門。南向閉。莫可入。從東側門入。一老僧從東廡

下煨煨見客殊不爲禮禮佛出將去之一爨下僧號德出留

就火薪不能然遍覓枯槎焙之就炙濕衣體始復蒸煨栗淪

茶腸始圃温余更以所攜飯乘沸茶食之已午過矣零雨漸

收遂向南坡降三里抵坡下卽楊林海子之西塢也其處遙

山大開西界卽嵩明後諸老龍之脊東界卽羅峰公館後分

支爲翠峰祖脊相對夾成大壑海子中匯焉其南楊林所城

當鎖鑰其北堯林山扼河口海東爲大道所經海西爲嵩明

所履但其處竹樹漸密反不遑遠眺大道東南去乃狗街子

道岐路直南去爲入州道余時聞有南京僧在狗街子州城

大道之中地名大一半邨者欲往參之然後入州乃從岐道

遊記 五册下
滇三

三五

下竹坑間行一里有大溪自西北環而東注卽果馬溪之循

西山出峽至是放而東轉者橫木梁跨石湫上湫凡三砥木

三跨而達涯之西其水蓋與新橋石幢河相伯仲者也旣度

卽平疇遙達邨落環錯西南直行六里而抵州由陞中東南

向遵小徑行二里過小一半邨又一里有大路自東北走西

南是爲狗街子入州之道道之北卽爲大一半邨道之南卽

爲玉皇閣入訪南京師已暫棲州城某寺其徒初與余言後

遂忘之南京僧號金余遂出從大道西南入州二里又有溪自西而東向注其

水小於果馬之半而頗急石卷橋跨之越而西南行灣陷殊

甚自翠峰小路來雖久雨之後而免陷淖之苦以山徑行人

少也。一入大路遂舉步甚艱所稱蜀道不在重崖而在康莊如此又三里直抵西山下轉而西南又一里而入嵩明之北門稍轉東而南停於州前旅舍問南京僧忘其寺名無從覓也。

二十七日密雲重布雖不雨不霧而街濕猶不可行余抱膝

不下樓作書與署印州同張拒不收又以一刺投州目管雖

收而不卽荅初是州使君爲吾郡鈕國藩

武進鄉薦

余初入滇已

陞饒州別駕至是東其轅及月矣三倅皆南都入余故以書爲庚癸呼乃張之扞戾乃爾始悔彈鋏操琴之拙也是日買得一野鳧烹以爲供

遊記 五册下

滇三

三六

二十八日晨起濃雲猶鬱勃惟東方已開余令肆婦具炊顧僕候管倅回書余乃由州署西踐濕徑北抵城隍廟其東爲察院其中北向登山數級右爲文廟左爲明倫堂尊經閣登閣天色大霽四山盡出始全見海子之水當其前是海子與楊林共之卽統志所云嘉利澤也以果馬巨龍江及白馬廟溪之水爲源而東北出河口爲北盤江之源者也由中路再上抵文廟後夾衢西入與文廟前後並峙者是爲宗鏡寺

寺建

于唐天祐中寺古而宏寂踞蛇山之巔今謂之黃龍山山小而石

骨稜稜乃彌雄山東下之脉起而中峙如錐州城環之爲州

治之後山者也

昔多小黃蛇故今以黃龍名之

登此則一州之形勢盡在目

中矣。嵩明舊名嵩盟。一統志言州治南有盟蠻臺。故址昔漢人與烏白蠻會盟之處。而今改爲嵩明焉。州城亦因山斜繞。門俱不正。其向與尋甸相似。嵩明正北由大山峽口入。竟日而通普岸巖章爲尋甸西境。正南隔嘉利澤與羅峰公館對。爲楊林北境。正東爲堯林山。踞河口之北。爲下流之砥柱。正西逾嶺爲舊邵甸縣。其北之梁王山爲老龍分支之處。領挈衆山。爲本州西境。與尋甸富民昆明分界者也。嵩明中環海子。田澤沃美。其西之邵甸。南之楊林。皆輿壤也。昔皆爲縣。而今省去。楊林當大道。今猶存所焉。出寺下山。還飯於店。而管倅回音不至。余遂曳杖出南門。轉而西。半里抵塔

遊記

五册下
真三

三十一

下大道東南由楊林去。余時欲由鬼兒關。乃西南行。一里有追呼於後者。則管倅以回柬具程。命役追至。而程猶置旅寓中。因令顧僕返。取余從間道北。向法界寺待之。法界寺者在城西北五里。亦彌雄山東出之支。突爲崇峰者也。路當從西門出。余時截岡逾隴。下度一竹塢。二里而北上。山躡坡盤級而上。二里逾一東下之春。見北塢有山一支。自頂下垂。而殿宇重疊。直自峰頂與峰俱下。路有中盤。胸中者有直躡峰頂者。余乃竟躡其頂。一里及之。西望峰後。下有重壑。壑西北有遙巘最高。如負屨挈領。擁列迴環。瞻之甚近。余初以爲嵩明之冠。而不知其仰梁王之東面也。轉而東。峰頭有元帝殿。剋

其頂門東向余入叩異間所謂南京師者仍不得也先是從
城中寺觀覓之不得有謂在法界者故余復迂途至而豈意
終莫可踪跡乎由殿前東向下歷級甚峻半里得玉虛殿亦
東向仍道宮也兩傍危簞迴合其境甚幽再下出天王殿又
下半里有一菴當懸岡之中深竹罨門重泉夾谷幽寂窈窕
惜皆閉戶無一僧在又下始爲法界正殿先入殿後懸臺之
上其殿頗整有讀書其中者而主僧仍不在乃下禮佛正殿
甫畢而顧僕亦從塢中上東廡有僧出迎詢知南京師未嘗
至而仰觀日色尙可行三十餘里遂詢道於僧更從北徑爲
邵甸行蓋楊林爲大道最南而迂鬼兒爲中道最捷而坦邵
甸爲北道則近依梁王最僻而險余時欲觀其挈領之勢遂
取道焉由寺前西南轉竹箐中隨吻而南一里逾東南岡出
向所來道遂南下山一里抵山下有塢自西北來卽前嶺頭
下瞰重壑之第一層也由其南橫度而西南二里過一邨邨
南始哇隘相屬隨膝南下西行哇中一里餘望見北岡垂盡
處石崖駢沓其東邨廬倚岡上爲靈雲山西有神宇臨壑是
爲白馬廟神宇之西有塢自北山迴環而成峽有大溪自峽
中東注而出卽前嶺頭遙瞰之第二層也其壑西南始遙逼
梁王最崇峰之下蓋梁王東突聳懸中霄北分一支東下爲
靈雲峰卽白馬所倚再北分一支東峙爲法界寺法界北壑

雖與梁王對夾而靈雲寔中界焉故梁王東麓之溪滌注俱從此出也其流與東山之巨龍江相似東西距州城遠近亦相似也溪無橋涉之卽西上坡始余屢訊途人言渡溪而西必宿大大邨邨之東皆層岡絕嶺漫無邨居問去邨若干里曰三十余仰視日色當已不及而土人言不妨速行而至再問皆然遂急趨登坡一里有負載而來者再問之曰無及矣不如返宿爲明晨計余隨之還仍渡溪入白馬廟廟敞甚不堪托宿乃東過駢香石崖從邨廬之後問宿於靈雲山僧是菴名梵虛僧雖不知禪誦而接客有禮得安寢焉

二十九日晨起碧天如洗亟飯仍半里渡溪躡西坡而上迤

遊記 五册下
滇三

三十九

遇五里逾岡脊東望嘉利澤猶在足下西瞻梁王絕頂反爲近支所隱不可見計其處正當絕巘之東此卽其支岡也岡頭多中陷之坎枯者成罅井滿者成天池稍西北盤岡一里復西南下一里度中窪之底復西北上行山南嶺坡間二里復西南下塢中其塢自西北崇峰夾中來中有流泉頗急循塢西崖東墜此梁王山東南之流也有岐路直自塢外東南來直西北向梁王山東腋去此楊林往普岸嚴章徑余交截之而西半里渡西涯急流復西北躡岡上頗峻一里躡峰頭已正當梁王山之南矣西向平行嶺頭一里又西下半里塢有小水猶東南流也一里徑塢又西上逾嶺半里復下其嶺

南北俱起崇峰夾之水已西南行余以爲過脊矣隨之下一里行峽中轉而南一里又有水自西北來同墜壑東注而下嘉利澤始知前所過夾峰之脊猶梁王南走之餘支也越水復西北躡峻而上一里半抵峯頭則當梁王山之西南矣是峰西南與南來老脊又夾坑東北下嘉利澤是肇東北與梁王主峰亦盤谷東下嘉利澤從脊上平行而西一里餘出西峒半里始見其脉自南山來者從此脊之西北下伏而再起遂躡時梁王焉梁王山者按志無其名余向自楊林西登老脊已問而知之云在邵甸東北故余取道再出於此正欲晰其分支界水之源也然志雖不名梁王其注盤龍江則曰源

遊記 五冊上
滇三

四十

自故邵甸縣之東山西山則指此爲東山矣其注東葛勒山則曰在邵甸縣西北高三十里爲南中名山遠近諸峰高無踰此則所謂三十里者又指此爲東葛勒山矣但土人莫諳舊名因梁王結寨其頂遂以梁王名之志無梁王名未嘗無東葛勒名也其脉自澂江府羅藏山東北至宜良分支東北走者爲翠峰之支正支西北走者由楊林西嶺而北度兔兒關又北度此而高聳梁王山橫亘於邵甸之北其東西兩角並聳東垂下臨白馬溪之西西垂下臨收養澗之東由西垂環而西南爲分支則文殊商山之脉所由行也由東垂走而東北爲正支則果馬月狐之脊所自發也西垂曲抱而盤龍

之源遂溶滇海東垂橫夾而嘉利之派遂滙北盤宜其與羅藏雄對南北而共稱梁王云過脊漸西降西瞰夾塢盤窩皆豐禾芑芑不若脊東皆重岡荒磧也一坡西垂夾塢中上皆側石斜臥從其上行二里始隨坡下墜一里及塢有小溪自東南塢中出越之西行又半里有郵聚南山下皆瓦房竹扉山居中之最幽而整者是曰大大郵始東西開塢梁王山西南之水由塢北西注余所越南塢之水截塢而從之半里越郵之西又開爲南北之塢有小水自南來經西岡下北合於東塢之水同破西北峽而下墜當西出於邵甸之北者也路越南來小水遂西南上坡盤坡而上約里許越其巔又西下

遊記 五册下
滇三

四十一

半里西南涉溪其溪似南流者一里又西逾坡脊平行坡上一里餘始見西塢大開其塢自北而南闢夾甚遙而環峰亦甚密塢中豐禾雲麗郵落星羅而溪流猶僅如帶若續若斷焉於是陡降西麓半里抵塢有郵倚麓西而廬是曰甸頭郵卽邵甸縣之故址也是郵猶偏於塢東塢北有峰中垂亦

有聚廬其上其地去嵩明州四十里重巒中間另闢兩益正北則梁王正脊亘列於後東界卽老脊之北走者西界卽分支之南環者其西北度處有岫頗平是通牧養東北循梁王山東垂而北是通普岸嚴章西逾嶺通富民縣東逾嶺卽所從來者惟南塢最遠北自甸頭十里至甸尾塢中之水南至

甸尾折而西南去路亦逾山而西遂爲嵩明昆明之界焉余
旣至甸頭邨卽隨東麓南行一里有二潭滌東涯下南北相
並中止有岸尺許橫隔之岸中開一隙水由北潭注南潭間
潭大不及二丈而深不可測東倚石崖西瀕大道而潭南則
祀龍神廟在焉潭中大魚三四尺泚泚其中潭小甸頭之水

自北來流於大道之西潭中水自潭南溢流大道之東已而
俱注於西界之麓合而南去路則由東界之麓相望而南塢

中屢過邨聚八里有小水自東峽出西入於西麓大溪踰之
南二里則甸尾邨橫踞甸南之坡有岐直南十里通兔兒關
正路則由邨西向行一里餘直抵西界之麓有石梁跨大溪

遊記 五册下
滇三

四十三

上逾梁始隨西麓南行半里溪水由西南盤谷而入路西北
向逾嶺一里登嶺頭一里下嶺西塢中路復轉西南行大溪
尙出東南峽中不相見也蓋其東老脊南自宜良經楊林西
嶺度而北一經兔兒關其西出之峰突爲五龍山則挾漚流
塘之水而出松花壩者也再北經甸尾東其峰突爲祭鬼山
則挾邵甸之水而西出漚流塘者也於是又西越塢脊四里
隨塢西下一里又有水自北峽來有梁跨之其勢少殺於甸
尾橋下水有邨在梁之西是爲小河口卽牧養之流南經此
而與邵甸之水合而出漚流塘者也過邨又西南上嶺盤折
山坡者七里中有下窪之窟旣而陡下峽中有水水自西北

峽來渡之邨聚頗盛邨之南則邵甸之水已與小河口之流合而西向出峽至此復折而南入峽中是爲滙流塘其濼迴之勢可想也從此路由西岸隨流入峽其峽甚逼夾翠駢崖中通一水路亦隨之落烈西傾窈不見影曲折四里有數家倚溪北岸是爲三家邨投宿不納蓋是時新開阿迷不順省中戒嚴故昆明各邨俱以小路不便居停爲辭余強主一家久之乃爲篝火炊粥啟戶就榻焉

盤江考 附

南北兩盤江余於粵西已睹其下流其發源俱在雲南東境余過貴州亦資孔驛輒窺之驛西十里過火燒鋪又西南五

遊記 五册下 滇三

四三

里抵小洞嶺嶺北二十里有黑山高峻爲衆山冠此嶺乃其南下脊嶺東水卽東向行經火燒鋪亦資孔乃西北入黑山東峽北出合於北盤江嶺西水自北峽南流經明月所西塢東南出亦佐縣南南下南盤江小洞一嶺遂爲南北盤分水脊一統志謂南北二盤俱發源霑益州東南二百里北流者爲北盤南流者爲南盤皆指此黑山南小洞嶺一東出火燒鋪一西出明月所二流也後西至交水城東中平開巨塢北自霑益州炎方驛南踰此經曲靖郡塢豆南北不下百里中皆平曠三流縱橫其間滙爲海子有船南通越州州在曲靖東南四十里舟行至州水西南入石峽中懸絕不能上下乃登

陸十五里復下舟南達陸涼州越州東一水又自白石崖龍
龍來與交水海子合出石峽乃滇東第一巨溪也爲南盤上
流云余憩足交水間曲靖東南有石堡溫泉勝遂由海子西
而南南下二十里一溪來自西北轉東南去入交海橋跨之
爲白石江涓細僅濶數丈名獨著以沐西平首破達里麻於
此遂以入滇也按達里麻以師十萬來拒與我師夾江陣是
日大霧沐分兵從上流潛濟繞出其後遂破之今觀線大山
溪何險足據且白石上流爲戈家冲源短流微濳帶不過數
里內沐公曲靖之捷誇爲冒霧涉江自上流出奇夾攻之爲
不世勳不知乃與均堂無異也度橋南六里抵曲靖郡出郡

遊記 五册下
滇三

早四

南門東南二十五里海子汪洋漲溢至是爲東西山所束南
下伏峽間橋橫架交溪上曰上橋橋西開一塢東向卽由上
橋西折入塢半里至溫泉泉可浴泡珠時發自池底北池沸
泡尤多對以六角亭曰噴玉東踰坡半里抵橋頭邨邨西行
田疇間忽一石高懸四面蒼叢樓楹上出卽石崖堡也與溫
泉北隔一塢徑平畦里許抵堡東麓南向攀級上凌絕頂則
海子東界山南繞於前西界山自北來中突爲此崖又西峙
而南爲水口山交溪南山上橋前爲東界山南繞所扼輒西
南滙爲海子正當石堡南其東北白石崖龍潭與東南亦佐
之水合交溪下流於越州乃西南破峽去而石堡正懸立衆

峰中諸水又匯而潑之危崖古松倍見幽勝北下山西一里抵石堡邨迴眺石堡西北兩面嵌空奇峭步步不能去由邨南下坡東半里逾一石梁南走梁下者卽交溪溪遂折東南去又東一里半抵東山麓東北上山從石片中行土傾峻墜崩嵌紛錯石骨競露如裂瓣從之傾折取道石多幻質色正黑如著墨片片英山絕品石中上者一里至嶺坳下見西塢南流之江下墜嶺南之峽乃交溪山橋頭南下橫截此山南麓以東去者也余已躬睹南盤源聞有西源更遠直西南至石屏州隨流考之其水源發自石屏西四十里之關口流爲寶秀山巨塘又東南下石屏壩爲異龍湖湖有九曲三島周

遊記 五册下
滇三

四十五

一百五十里島之最西北近城者曰大水城頂有海潮寺稍東島曰小水城舟經大水城南隅有菱荷百畝巨朵錦邊湖中植蓮此爲最盛水又東經臨安郡南爲瀘江穿顏洞出又東至阿彌州東北入盤江盤江者卽交水海子南經越州陸涼路南寧州至州東六十里婆兮甸合撫仙湖水又南至播箕街河甸合曲江又東至阿彌州稍東合瀘江二江合爲南盤江遂東北流廣西府東山外余時徵諸廣西土人竟不知江所向乃北過師宗州又東北去羅平州十五里抵一塢曰興哆囉其塢西傍白蠟東瞻羅莊南去甚遙而羅莊山森峭東界皆石峰離立分行競奮復見粵西面目蓋此叢蠹怪峰

西南始此而東北盡于道州磅礴數千里爲西南奇勝此又其西南之極也已而至羅平詢土人盤江曲折始知江自廣西府流入師宗界卽出羅平東南隅羅莊山外抵巴且彝寨會江底河寨去羅平東南二百里江東卽廣南府境又東北經巴澤河格巴吉興隆那貢至霸樓爲霸樓江

處地名俱西安隆長

官司地今安隆無土官

遂入泗城境之八蠟者香於是爲右

江再下又有廣南富州之水自者格經泗城之葛闡歷裏來合而下田州云後余至雲南省城過楊林見北一海子特大

古稱嘉利澤北成大溪出河口溪北有山甚峻曰堯林山又

東北十里出峽經果子園北至尋甸府合郡城西北水匯爲

遊記 五册下 滇三

四一六

南海子又東北與馬龍水合于郡東二十里七星橋爲阿交

合溪余因究水所出知其下雷益州爲可渡河乃北盤江上

流也按此則南北二盤但名稱之同耳發源非一山之水北

盤自可渡河而東始南合亦資孔火燒鋪之水則火燒鋪非

北盤之源也南盤自交水發源南渡越州始合明月所之水

則明月所非南盤之源也乃一統志北盤捨楊林南盤捨交

水而取東南支分者爲源則南北源一山之悞宜訂正者一

又以南盤至八蠟者香一水自東北來合土人指以爲北盤

江遂謂南北盤皆出於田州夫北盤過安南已東南下都泥

由泗城東北界經那地永順出羅木渡下邊江則此東北合

南盤之水自是泗城西北箐山所出謂兩江合於普安州泗
城州之悞宜訂正者二至統志最悞處又謂南北二盤分流
千里會於合江鎮蓋惟南寧府西左右江合流處爲合江鎮
是直以太平府左江爲南盤田州右江反爲北盤矣今以余
所身歷綜核之南盤自雷益州炎方驛南下經交水曲靖南
過橋頭由越州陸涼路南抵阿彌州境北合曲江瀘江始
東轉漸北合彌勒巴甸江是爲額羅江又東北經大相塢小
相塢又北經廣西府東八十里永安渡又東北過師宗州東
七十里巽如渡又東北過羅平州東南巴且寨合江底水經
巴澤巴吉合黃草壩水東南抵霸樓合者坪水始下舊安隆

遊記

五册下
真三

四七

出白隘爲右江北盤自楊林海子北出高明州果子園東北
經熱水塘合馬龍州中和山水抵尋甸城東北去彝地爲車
洪江下可渡橋轉東南經普安州北境合三板橋諸水南下
安南衛東鐵橋又東南合平州諸水入泗城州東北境又東
注那地州永順司經羅木渡出遷江來賓爲都泥江東入武
宣之柳江是南盤出南寧北盤出象州相去不下千里而南
寧合江鎮乃南盤與交趾麗江合非北盤與南盤合也其兩
盤江相合處直至潯州府黔鬱二江會流時始合但此地南
北盤已各隱名爲鬱江黔江矣則謂南盤北盤卽爲南寧左
右江之悞宜訂正者三若夫田州右江源明屬南盤志書又

謂源自富州是棄大源而取支水猶之志南盤者源明月所
志北盤者源火燒鋪也彼不辨端末巨細悍然秉筆類一丘
之貉也夫

裔孫 熙海南校字

遊記 五册下
滇三

四十八



遊記第五册下 終

08453

82130

